

0, 519/4

C. IV.

18/5



Digitized by the Internet Archive
in 2018 with funding from
Wellcome Library

<https://archive.org/details/b30508496>

26157.
D E
COLICA PICTONUM
TENTAMEN.

Accedit

D E
NATURA SEDE ET ORIGINE
HYDATIDUM
DISQUISITIO.

Auctore

JOANNE GRASHUIS,
*MED. DOCTORE, ACADEMIÆ CÆSAREÆ NA-
TURÆ CURIOSORUM, ET REGIÆ CHIRURGI-
CÆ PARISIENSIS SOCIO.*



AMSTÆLODAMI,
Apud ISAACUM TIRION, 1752.

*Etiam non assecutis, voluisse, abunde pul-
chrum atque magnificum est.*

PLINIUS.





PRÆFATIO.



Colica Pictonum ut ægro, quem invadit, multum doloris, ita Medico, ipsi opem ferenti, haud parum molestiæ tædiique creare solet. Nihil enim tædiosum magis, cui id maxime cordi est, ut ægrorum sibi commissorum amissa sanitas in integrum restituatur, quam desideratam ab ægritudine recreationem, omnibus adhibitis conatibus, subministrare non potuisse. Id mihi, *Colicæ pictonicæ* medenti, sæpius accidisse non inficior; aliis experientissimis viris contigisse novi. Morbi natura nondum perspecta, quamvis Curationis methodum incertam esse, nemo non videt; fallax in compluribus medicationis eventus confirmat. Hanc penitus rimari, eique inventæ, ad Curationem

perficiendam Indicationes superstruere, egregii quidam viri conati fuerunt; non infelici cum successu, re tamen, in confesso est, omnibus numeris non absoluta. Horum ego vestigia insecutus, in id imprimis incubui, ut seposita antecedente causa, proximam, omnium calamitatum, in hoc morbo, fontem & originem, maxima qua poteram industria, investigarem. In hunc finem præcipua *Colicæ pictonicæ* symptomata cum aliorum morborum, huic maxime similium, symptomatibus contuli; horum causam proximam, quousque est aperta, speculatus fui; phænomena eorum, observatione nota, vel imprimis practica, ut dicitur, Anatome detecta, sedulo perpendi; aliaque, sive casu, sive consulto ad hanc rem facientia adjunxi. Quibus omnibus collectis, inter se comparatis, & ad *Colicam* prædictam applicatis; causam proximam aliquo modo perspicuam reddi, mihi nata est suspicio. Quam,
dum

dum conjectura me affecutum credidi; ad hanc Curationis intentiones, in ægrotis meæ curæ deditis, penitus direxi. Spe concepta non frustratus, repetitisque experimentis nonnihil audacior factus, eam ceuveram, vel verosimilitudinis ingentem speciem præ se ferentem contemplatus fui. Ex hac supposita, variisque, ut puto, argumentis stabilita, Morbi aliqualem me conformasse ideam; indeque Curationis methodum derivasse mihi visus fui, experimentis comprobata confirmatamque. Qua via, quove modo hæc pervestigari vel argumentis demonstrari possunt, sequens Commentatio aliquatenus, ut spero, explanabit. Hanc idcirco cum publico communicare quidem volui, ut, licet consummatam morbi historiam non comprehendat, quam ab aliis sufficienter delineatam credidi; accuratorem causæ proximæ perceptionem suggereret; ægrosque morbo colico laborantes levandi aliqualem

methodum indicaret; vel aliis tandem, in rem ulterius, & renovatis curis, inquirendi animum adderet. Omnia tentaminis modo proposui, ad meliora, si quis edoctus candidus impertiverit, amplectenda paratus.

Quæ ad calcem accedit, de Natura *Hydatidum* Disquisitio, olim cum Academia cæsarea Naturæ Curiosorum communicata fuit, Actorumque physico-medicorum Tomo septimo inserta. Quoniam vero Acta hæc, in nostra Regione non omnium manibus teruntur, illam huic Tentamini, exiguis quibusdam additionibus auctam, adjungere decrevi.

CONTENTORUM

I N

T E N T A M I N E

D E

C O L I C A P I C T O N U M

E L E N C H U S.

- §. I. *Colicæ* Descriptio.
- II. *Colicæ* Pictonum Definitio.
- III. Causæ antecedentes multiplices.
- IV. Causa proxima.
- V. Incognita, ex comparatione *Colicæ* cum aliis morbis indaganda.
- VI. Similitudo *Colici* cum Dysenterico dolore.
- VII. Dysentericæ & Tenesmi causa proxima incognita.
- VIII. Dolorum causa ex symptomatibus detegenda.
Præcipuorum enumeratio.
- IX. Dysentericorum dolorum causa proxima Muci abscessio videtur.
- X. Eadem causa proxima ad *Colicam* applicata.
- XI. Muci abscessiones in aliarum quoque partium morbis observatæ.
- XII. In Stranguria visibiles.
- XIII. Conclusio assimilationis.
- XIV. Antedictorum applicatio ad *Colicam*.
- XV. Ex natura Tunicæ villosæ, a *Monroo* demonstrata illustratio.
- XVI. *Colicæ* symptomatum ex eadem causa proxima explicatio.
- XVII. Prognosis incerta.
Morbus difficilis est curatu.
Sæpe recidivat.
Ex symptomatibus, de statu & eventu iudicium est formandum.
Morbus nulla evacuatione critica sensibili solubilis.

VIII CONTENTOR. ELENCHUS.

Neque Caloris vel Frigoris in eum effectus
satis perspecti.

§. XVIII. Ad Curationem transitio.

XIX. Empirica Curatio.

XX. Curationis methodus causæ proximæ super-
structa.

Indicationes quatuor.

XXI. Prima Indicatio Anodyna exposcit.

XXII. Secunda Demulcentia requirit.

1. Interna.

2. Externa.

XXIII. Tertiæ Indicationi ut satisfiat ipsum partium
vitium confortantibus corrigi debet.

XXIV. Quarta Indicatio Alvum relaxantibus absolvi-
tur.

Clysmatibus.

Internis Relaxantibus.

XXV. De Venæsectionibus aliisque curationis Indi-
cationibus judicium.

De Venæsectione.

De Vesicantibus, Fonticulis & Cucurbitulis.

De Ustione candente Ferro & Moxa.

De Emeticis & Purgantibus.

XXVI. Diæta.

XXVII. De symptomatibus nervosis medendis.

XXVIII. A Recidivis conservatio.

De Vitandis.

De Præstandis.

XXIX. Additamentum de Cardialgia feroci.

XXX. *Colicæ pictonicæ* similis est.

XXXI. Iisdem Remediis ac *Colica* curanda.

Coronidis loco.

Historia Colicæ habitualis & dysentericæ Cor-
ticis Simaroubæ ope felicissime curatæ.

Historia Stranguriæ vel Tenesmi Vesicæ, per
viginti & ultra annos molestissimæ, subi-
tissime curatæ.

SECTIONUM DISQUISITIONIS

D E

NATURA, SEDE ET ORIGINE HYDATIDUM E L E N C H U S.

- §. I. *Hydatidis* Definitio.
- II. Aliorum de *Hydatidibus* opiniones propriis cogitationibus anteponendæ.
- III. A Veteribus *Hydatidum* natura non perspecta.
- IV. Recentiorum Scriptorum opiniones ; a Concreuione Pituitæ lentæ oriri.
- V. Glandulas esse.
- VI. Ex distensione Vasorum lymphaticorum nasci.
- VII. Vasa sanguifera esse præternaturaliter mutata.
- VIII. Ex effusione humoris lymphatici inter vicinas membranas produci.
- IX. Vermes esse.
- X. De Natura *Hydatidum* cogitationes propriæ. *Hydatidum* exortus ubivis, ut *Membrana cellulosa* ubique præsens.
- XI. *Hydatides* in *Cellulosa* seclusæ reperiuntur, iis producendis apta.
- XII. Globuli sebacei, & *Hydatides*, in *Cellulosa* conjuncti, similis originis suspicionem inducunt.
- XIII. Materies in *Hydatidibus* contenta suspicionem augeat.
- XIV. *Hydatidum* in majori sacco, vel & aliis *Hydatidibus* inclusio Membranæ cellulosæ ope explicari potest.
- XV. *Hydatides* variis in locis simul occurrentes prioribus argumentis pondus addunt.
- XVI. Accedit *Hydatidum* numerus ingens & saccorum includentium magnitudo,

XVII

SECTION. ELENCHUS.

§. XVII. Et ingens *Hydatidum*, ratione substantiæ varietas.

XVIII. Rotunda *Hydatidum* figura explicatu facilis est.

XIX. Nec obscurum, integras corporis partes in *Hydatides* mutari.



D E

COLICA PICTONUM
TENTAMEN.

18

QUICK PICTURES

THEATRE



D E

COLICA PICTONUM TENTAMEN.



§. I.



COLICA Medicis, nostris tem- *Colicæ de-*
poribus, quemlibet Intestino- *scriptio*
rum; tam tenuium quam cras-
forum dolorem significat. Va-
riis additis epithetis, a Cau-
sa vel Symptomate primario desumptis,
distinguitur in ventosam, biliosam, in-
flammatoriam, convulsivam, aliamve.
Quæ atrocissimo dolore sævit, longa est,
omnique fere Remedio resistit, PICTO-
NUM hodie dicitur; & hisce fere cha-
racteribus ab omni alia dignoscitur. Mul-
ta equidem hæc cum aliis *Colicæ* specie-
bus communia habet: doloris vero sævitie,
& tantum non intolerabilibus cruciati-
bus omni alia vehementior & pertinacior.
Ventosa discutientibus & carminativis;
biliosa temperantibus & evacuantibus; in-
flam-

2 DE COLICA PICTONUM

flammatoria venæsectionibus & antiphlogisticis, alia aliis superabilis; hæc nullis vincenda Remediis diversam sui genii notam exprimit. Haud raro huic Ventris introtractio, Vomitus, Alvi pertinacissima constipatio, Febris, Vigiliæ, Deliria, Convulsiones adfunt, & Paralyfis membrorum: ea tamen non omnia in eodem subjecto, vel eodem tempore semper accedunt.

§. II.

*Colicæ
Pictonum
definitio.*

Colica Pictonum itaque nostratibus designat *Dolorem colicum atrocissimum simul & pertinacissimum* ex quacumque causa natum.

§. III.

*Causæ antecedentes
multiplices.*

Colicum dolorem a Causis antecedentibus quamplurimis, maximeque inter se diversis oriri posse, & reipsa oriri, experientia non minus quam sana ratio docet. Ingens invenitur apud Auctores causarum recensitarum catalogus, qui forte & multis aliis augeri facile posset; inter quas etiam illas comprehendi verosimile ducitur, quæ *Pictonum Colicam* oriri faciunt. Præcipuæ earum quæ enumerantur, sunt: Scorbutus, Arthritis, Febres.

in-

intermittentes (male curatæ, ut quibusdam placet,) Febres continuæ; Ingesta acria, vel acrimoniam inducentia, Venena, abusus potuum aquosorum, Vini adulterati; & multæ aliæ, quarum quædam ex hypothesi natæ & fictæ forsitan magis, quam ipsa morbi natura fundatæ (a).

§. IV.

An memoratæ omnes & ejus generis *Causa* plures causæ dolorem colicum, *pietoni-* proxima: cum dictum, excitare valeant, vel revera excitent, determinare non ausim. Enimvero videtur, quæcunque ex antecedentibus causis *Colicæ* ansam dederit, certam quandam dispositionem in Intestinis, causæ proximæ nomine, oriri, antequam dolor generetur; qua præsentē, dolor excitatur & perseverat, ablata, dolor cessat; vel antecedentē causa, ex qua hæc, tanquam proxima originem traxit, nondum penitus sublata.

§. V.

Hæcce itaque Intestinorum conditio, Incognita
ab ex com-

(a) Videatur præ omnibus anonymi Auctoris, medice docti, *Dissertation sur la Colique*, Bibliotheq. raisonn. Tom. VIII. pag. 30. Tom. IX. pag. 144 & 279. qui & ipse Bibliothecæ conscribendæ operam dat. Bibl. R. Tom. XLVI. pag. 38. *De Haen de Colica Pieton.* pag. 18. &c.

4 DE COLICA PICTONUM

paratione
Colicæ
cum aliis
morbis in-
daganda.

ab antecedente causa nata, inquirenda maxime est, ut Morbo solamen adferri possit. Hanc incognitam suppono hætenus; saltem a nemine quantum scio indicatam. Hæc indicatu facilis non videtur. Sedula forte facta comparatione hujus cum aliis morbis magis cognitis, aliquid luminis, quod maximopere sperandum, indagationi affulgebit. Pretium operæ me facturum credidi, meos qualescunque intendere conatus, ad detegendum, quid valeat in morbis analogia, & experimentorum in hisce cum aliis collatio.

§. VI.

Similitudo
Colici cum
Dysenterico
dolore.

MORBUS hicce, sive *Dolor colicus*, morbum constituens imprimis assimilari debet illi, qui cum ipso maximam habet affinitatem; qualis in *Dysenteria* dolor esse videtur, vel qui ejusdem frequentissima sequela est, *Tenesmo*. Ambo etenim & hic, & qui in *Colica* de qua agimus, sentitur, Intestinorum affectiones sunt, & multa cum invicem communia habent.

I. Dysenteria, imo & Tenesmus, in quem, si præcipua symptomata superaverit æger, ut SYDENHAMI verbis utar, & morbus in longum trahatur, Intestina ordine quæque suo, deorsum versus affici videntur, donec in rectum in-

testi-

testinum malum omne detrudatur & in Tenesmum desinat (a); Dysenteria, inquam, morbus est dolores, torsiones & cruciatus Intestinorum infestissimos inducens. *Colica Pictonum* dolorum crudelitatem & molestiam, ægros vix momento sibi relinquentem, sed & perpetuos in reptatus, & desperabundas quasi vociferationes incitante dignoscitur. Perforanti terebræ vel palo intestinis infixis utriusque morbi dolores ab ægris æquiparantur, & pene simillimi describuntur.

2. Dysenterici vel & Tenesmi dolores non omni tempore æque molesti esse solent; & per intervalla denuo aggrediuntur. *Colica Pictonum* nonnunquam inducias facit, ægroque solamen concedit; dum ex improvise reduplicatis quasi viribus, majorique quam antea ferocitate, rursus invadit.

3. Uterque morbus ut plurimum levioribus accessionibus incipiens, & ab ægris neglectus, sensim dolores & tormina graviora & frequentiora infert.

4. Nauseæ & Vomitus *Colicæ Pictonum* frequenter adsunt. Dysenterici morbi dolorum haud raro perpetui fere commites (b).

5. Vi-

(a) Sydenh. Oper. pag. m. 180.

(b) Videatur Degnerus in Historia de Dysenter. bilioso-contagiosa, pag. 15, 33. & alibi passim.

6 DE COLICA PICTONUM

5. Vigiliæ perpetuæ, Deliria, Convulsiones, dolori *colico* & dysenterico communes sunt (a).

6. In Tenesmo dysenterico Muci intestinalis fere perpetuæ egestiones. Simile quid, minori tamen cum frequentia, in *Colica* observatur; ob loci affecti, ut videtur diversitatem, in *Colica* ab Intestino recto remotiorem.

7. Dysenterici Tenesmi dolores exasperantur Medicamentis acrioribus, stimulantibus omnibus; leniuntur demulcentibus, oleosis, mucilaginosiis, sine calore roborantibus vel adstringentibus. Idem omnino in *Colica* nostra observatur, a Medicis in rem intentis non tantum, sed & dolentibus & sensu admonitis ægris.

8. Tenesmi dysenterici dolores longi sunt, & haud raro omnibus Remediis resistentes. Eadem conditio *Colicæ Pictonum* characterem constituit (§. I. II.).

9. Ut Dysenteria sæpe; sic *Colica Pictonum* quandoque epidemice grassatur (b). An contagiosa quoque sit, certo adfirmare non possum; nonnunquam tamen plures in una domo eadem simul decumbentes

(a) Degner. pag. 17.

(b) Æginet. Lib. III. cap. 43. Cites. de Colico dolore pictonico, pag. 170, 204. Bibl. raisonn. Tom. VIII. pag. 30. Huxham de Morbo colico Dammon. pag. 5.

bentes vidi, idque ab aliis etiam observatum esse scio. Imo ut uno verbo absolvam, quandoque *Colicæ* cum Dysenteria tanta intercedit convenientia, quod ex casu inferius enarrando patebit (a); ut quo nomine, vel qua methodo describi & percurari debeat, dubium valde, incertumque sit.

Ex hac horum morborum in multis similitudine, aliquam qualemcumque suspicionem nasci mihi videtur, ejusmodi dispositionem Intestinorum, quæ in Tenesmo dysenterico, diros cruciatus excitat, in *Colica Pictonum* dolores crudelissimos procreare. Neque tamen in omnibus, vel penitus consimiles esse morbos statuo. Non Morbi cum Morbo, sed doloris hujus cum doloribus alterius maximam intercedere convenientiam ostendere volui. Dejectiones fere perpetuas, liquidas, & sæpe cruentas, Dysentericæ familiares; & omnium fortasse torminum causam (non dico proximam) constituentes, a *Colica* nostra alienas esse, ut verissimum, ita omnibus notissimum, suppono.

§. VII.

CONSULENDI itaque sunt, ut Dysen-
Dysentericæ & Tenes-

(a) Infra, ad finem Tentaminis.

8 DE COLICA PICTONUM

nesmi cau-
sa proxima
incognita.

teriae vel Tenesmi causam proximam indagemus, Auctores, qui de hoc morbo scripserunt, optimi; consulenda tandem experientia est. Ast, quod maxime dolendum, dicam an mirandum, vix quicquam apud Scriptores reperitur, quod attento in hanc rem indagatori satisfacere potest. De acri quodam Intestinorum humore, sive inquilino & præter naturam depravato, vel aliunde in ea delato, frequens quidem mentio occurrit; acrimonia quædam venenata, stimuli inimici vicem gerens, ut causa proxima unanimiter admittitur. Atqui hæc, ut nihil explicant, ita novæ obscuritatis causam inferunt: quippe quale sit verum stimuli dysenterici ingenium, nemo sagacissimorum Medicorum depinxit hætenus, ut jure merito animadvertit doctissimus TRALLES (a); adsentitur DEGNERUS (b) aliique. In hoc Morbo itaque non minus quam in sævissima *Colica*, id quod torminibus oriundis occasionem præbeat proximam, in *Democriti* puteo latere hætenus, cum laudatissimis viris, dici potest. Missis ergo hisce, in dolorum causam proximam solam, non æqualiter obscuram credo, inquirendum est.

§. VIII.

(a) Trall. Exam. rigoros. pag. 166.

(b) Degner. Hist. pag. 45, 75, 82.

§. VIII.

Ex Symptomatibus forte & circumstantiis quibusdam dysentericum morbum concomitantibus, quæ sensibus observari possunt, Morbi natura, vel doloris ejusdem causa proxima illustrari utcunque poterit. In Dysenteria vel Tenesmo dysenterico sequentia, ex Morbi historia, & experientia, præ omnibus aliis maxime notabilia, & communia esse discimus.

1. Mucosæ materiæ, majori vel minori copia egestiones. Id cuilibet Dysentericis medicinam facienti, excernendorum inspectione, notissimum est. De Dysenteria agens *Sydenhamus*, „Dejectiones,” inquit, „mucosæ sunt omnes (a).” Idem, de Dysenteria epidemica, passim testatur *Degnerus*; ne infinitos numero alios adducam.

2. Ramentorum villosæ Tunicæ Intestinorum abrasæ ejectiones cum excrementis; quorum exempla, sat magno numero, apud Observatores antiquos non minus quam recentiores obvia sunt. De Ramentis Intestinorum, ablata ipsorum superficie interiore, quæ membranosa est, & quæ cutim exterius contegit, Epidermidi proportionalis, monuit GALENUS

(a) *Sydenh.* pag. 179, 601.

10 DE COLICA PICTONUM

NUS (a). Præter maximam puris copiam, membranam excretam fuisse longitudinis ulnæ, se vidisse ait HERCULES SAXONIA (b). De interioris Intestini recti Tunicæ excretionem, mentionem facit TULPIUS (c). Portiones Tunicæ villosæ Intestini recti humani, e corpore vivo, post cruciatus immanes, & dejectiones cruentas, suo tempore demonstravit RUISCHIIUS (d). De villosæ membranæ fragmentis, per anum ejectis, & omni cura perlustratis, ne ulla spurii ex Muco facti concrementi suspicio superesset, observationem dedit clarissimus SIMSON (e). De fecibus alvinis, Tunicæ interioris villosæ abrasiones referentibus, scribit laudatus jam antea Degnerus (f).

3. Ulcera magis minusve profunda, in Intestinorum parte intima, foetida, imo maligna, cancrofa, ex abrasionibus orta, & facile oriunda (g). Non male itaque DURETUS, de Lienteria agens, „Causa“, inquit, „altera præcipitis egestionis, proptereaue crudæ, quæ in
„ con-

(a) Galen. in Aphor. Hippocrat. comment. IV. 26.

(b) Hercul. Saxon. Panth. Med. pag. 260.

(c) Tulp. Observ. pag. 204.

(d) Ruisch. Thesaur. anat. I. Aff. III. N. VI.

(e) Medical Eff. Edinb. Vol. V. Part. II. pag. 656.

(f) Degner. Hist. pag. 15, 25, 142.

(g) Id. pag. 142.

„ continentiam Ventris ostendit, --- est
 „ aphthosa Ventriculi tunica, id est, le-
 „ vis & superficie tenus impressa exulce-
 „ ratio, qua similiter fit in alvo Liente-
 „ ria, ut Stranguria in Vesica (a)“.

Confirmant quæ dicta sunt, Dysente-
 ricorum dissectiones anatomicæ. *Bontius*,
 apud *BONETUM*, se aperuisse dicit ali-
 quot cadavera Dysenteria mortuorum;
 inter quæ corpus militis cujusdam e diu-
 turna Dysenteria vita functi, cujus In-
 testina vehementer inflata, ac eorum in-
 teriorem tunicam plane abrasam inve-
 nit (b). Idem *Bonetus* ex *Benivenio* an-
 notat, Dysenteria laboranti, mutuo u-
 triusque lateris ulcerati contactu, Intesti-
 na coaluisse (c). In Intestini Coli por-
 tione, circa Rectum abscissa, magna &
 varia ulcera, a prægressa Dysenteria pro-
 ducta, vidit *Ruischius* (d). De *Colica*
pietonica ex *P. Milonis* primarii Regis
 Medici adversariis, apud *Citesium* men-
 tio fit; in defuncti cadavere Intestina,
 aliquot locis, distenta adeo fuisse, aut
 ita extensa, ut pene rumperentur, vel
 fractis vel exesis, bilis ipsius acrimonia
 (quæ

(a) *Duret.* in *Coac. Hippocrat.* pag. 335.

(b) *Bonet.* *Sepulchret.* Tom. II. pag. 170.

(c) *Ibid.* pag. 172.

(d) *Ruisch.* *Thesaur. anat.* IX. N. LXII. lit. K.

12 DE COLICA PICTONUM

(quæ ex vulgari tunc temporis hypothesi, dolorum causa habebatur) interioribus tunicis (a). Casus, certe, ob similitudinem repertorum, antecedentibus jure merito adnectendus.

§. IX.

Dysentericorum dolorum causa proxima Muci abscessio videtur. Liquidas Dysentericæ dejectiones, quæ vel sine dolore sunt; vel non magnos ab initio in omnibus dolores inferunt, minime morabor; de cruciatibus morbo confirmato vel in Tenesmum jam mutato, ægros infestantibus, solum agere, instituti ratio postulat. In horum causam, non priorum, inquirere animus est. In Dysentericis itaque & Tenesmi affectionibus diris, Muci intestinalis abrasiones, saltem abscessiones, & quæ exin sequuntur, Tunicæ interioris vel denudationes vel excoriationes, quacunque demum causa productas, ad excitandos dolores, maximas partes agere, vero quam simillimum videtur. Ex anatomicis etenim & theoreticis notissimum est, Intestinorum superficiem intimam, in statu sano, abundantanti Muco obliniri; qui si nimis cito abscedat, ut in Diarrhœa & Dysenteria, ex dejectionibus mucosis, ad oculum appa-

(a) Cites. pag. 232.

paret, (clarissimi MONROI verba mea facio,) vel minori, quam decet, copia fecernatur, ut in Inflammationibus aliisque morbis; facile concludendum est, quæ inde necessario sequi debeant (a); dirissimi nimirum & atrocissimi dolores. In motu peristaltico, (BOERHAAVII verba sunt,) membranæ Intestinorum perpetuo ad se invicem confricantur; sensilissimæ dum sint, oriretur dolor intolerabilis, si nudæ valvulæ nudas contingerent, neque interponeretur Mucus, ex cryptis & glandulis varii generis expressus (b). Quare homines, ut alio loco se explicat idem Auctor, celerrime pereunt ab Inflammatione & excoriatione Intestinorum (c). Similem conditionem in Dysentericorum Intestinis adesse, vel Dysenteriam, ut effectum sequi Sydenhamus auctor est; causam abrasionis insuper adjungens: importuno, dicit, Intestinorum nisu, quæ omnem adhibent operam, ut humores acres continuo infestantes expellant, Mucus iste, quo naturaliter obducuntur, singulis sedibus, nunc parcius nunc copiosius, una egeritur (d). Dolores idcirco, in hisce affectibus

(a) Medical Ess. Edinb. Vol. IV. pag. 82.

(b) Prælectiones Boerhaav. Vol. I. pag. 294.

(c) Ibid. pag. 297.

(d) Sydenh. Oper. p. 182.

14 DE COLICA PICTONUM

tibus crudelissimos, & quæ inde enascuntur symptomata, Vigilias, Convulsiones, & ejus generis plura, a prima tunicarum internarum denudatione incipere; ac eousque sævire, donec ad naturalem statum, Muco instaurato & relicto, redierint tunicæ; Morbi periculum, sanationem vel mortem, ex gravitate seu magnitudine hujusmodi læsionis, vel maxima ex parte, vel unice dependere, plusquam simillimum vero esse, ut & omnes observationes confirmare videntur.

§. X.

Eadem
causa proxima ad
Colicam
applicata.

IDEM, perfecte, vel quidquam huic simile, etiam in aliis Intestinatorum morbis, dejectionibus dysentericis vel irritis Tenesmi conatibus non stipatis, locum habere, si demonstrare potuerim; *Colicæ* nostræ cum Dysentericis aut Tenesmi doloribus, respectu causæ proximæ similitudo, non minus quam vera ejus natura, ut credo, haud obscure patefcet. Id fieri posse, observationum auctoritate demonstrare conabor. Ventriculi tunicas erosas plane, post mortem repertas fuisse, ex abusu, ut dicitur, magisterii Perlarum, sine ulla Dysentericæ antegressæ, vel Muci, aliorumve præternaturalium, ex Intestinis dejectionibus, facta mentione,

ne, ex *Cratone* auctor est *Bonetus* (a). Ventriculum & reliqua viscera, ex usu spiritus Vitrioli erosa fuisse, ex alio monet (b). Ex *Marcello Donato* historiam enarrat Vomitus fere continui, non adsumptorum tantum, sed & Pituitæ, magna in copia, cum iis permixtæ, ad mortem usque perseverantis; In cadavere dissecto, in ima Ventriculi regione, juxta os infernum Tunica interior exesa conspiciebatur (c). A doctissimo *Simfone* antea laudato observatio maximi ad causam nostram momenti, Actis Edinburgensibus inserta legitur. Phthisi pulmonali nempe defuncti viri cadavere dissecto, ubi Ventriculus & Intestina aperta fuerunt, vix ullæ in iis aderant Rugæ. Membrana villosa paucis tantum in locis Intestinorum superficiei intimæ connexa erat: verum abrafa hujus fragmenta, passim, per intestinalem tubum dispersa inventa fuerunt, rubicunda admodum, & quasi arte injectoria repleta. Nervea tunica denudata erat in Ventriculo æque ac Intestinis, nullibi fere tecta, nisi in Intestino recto, & Coli parte huic vicina (d). GALENI in se ipso observatio, propter

vi-

(a) *Bonet.* Sepulchret. Tom. II. pag. 67.

(b) *Ibid.* (c) *Ibid.* pag. 90.

(d) *Medical Esf.* Edinb. Vol. V. Part. II. pag. 655.

16 DE COLICA PICTONUM

viri & antiquitatem & auctoritatem, relique similitudinem, hic adduci meretur. In dolore, qui ipsum invaserat, acerbissimo ita ut sibi videretur in intimo ventre terebra perforari, se pituitam vitream per alvum excrevisse refert, atque id aliis quoque accidere meminit. Hujusmodi sane dolores, inquit, perinde ac si terebra partes perforentur (quam similes hisce sunt ægrorum nostrorum, *Colica pictonica* decumbentium querelæ, ipsissimis verbis frequentissime prolatae!) molestare solent, narrantibus ita infirmis; alii vero, veluti palo infixi fieri videntur (a); sine ulla Dysenteriae memoratio-
ne adjecta. Non moror nunc magnum virum Pituitam excretam criticam dolorum solutionem, non causam existimasse unde dolores antea nati. Hic antiquorum non tantum, sed & recentiorum multorum auctorum communis error, nostris temporibus, fatis superque confutatus esse videtur. De ramentosis per alvum excretis, in biliosa *Colica*, loquitur ALEXANDER TRALLIANUS (b). Pituitam tenacem magna copia vomitu ejectam, in Morbo colico epidemico Damnonio-
rum

(a) *Galen. de Loc. affect. Lib. II. cap. 54*

(b) *Alexand. Trall. Lib. X. cap. 1.*

rum scribit, egregius HUXHAMUS (a). Ipse ego ab ægris; Ventriculi dolore chronico & *Colica* laborantibus, aliquando Mucum, ingenti copia; per alvum rejectum vidi, nulla existente Dysenteria nota, cum carunculis intermixtis; de quibus apud Veteres æque ac recentiores, frequens mentio, cum urina non minus quam fecibus alvinis excernendis (b).

§. XI.

NON abs re fore mihi videtur, quæ Muci ab-
de ejusmodi Muci lubricantis abscessione
in aliarum partium morbis observata fue-
runt; antedictis adnectere. Oesophagum
fabrica intestinali tubo similem esse; vel
cum eo unum continuum canalem consti-
tuere; Oris, Fauciumque internarum su-
perficiem; Laryngis itidem & asperæ Ar-
teriæ, simili omnino structura; cryptis
mucosis multiplicibus ditatam, ex anatomi-
cis hodie plusquam notissimum est. Omnes has partes Muco tenaci, in statu
sa-

abscessiones
in aliarum
quoque
partium
morbis
observa-
tæ,

(a) *Huxham* de Morbo col. pag. 5.

(b) Σάρκες dixit *Hippocrates* Sect. IV. Aphor. 26 & 76. *Celsus* Carunculas vocat. Lib. II. cap. 7. pag. 60. An contracta & corrugata fragmenta Membranæ intimæ tubi intestinalis? Sic clarissimus *de Gorter* ad Aphor. citatum 26. Videatur etiam *Degnerus*. Hist. pag. 25.

fano, obliniri & muniri; easque in statu morboſo eo orbari, indeque denudari poſſe, multa ſunt quæ nos convincunt. Quin intimam omnium dictorum organorum membranam abſcedentem foras ejici, hiſtoriæ practicæ docent. De Laryngis internæ Tunicæ fragmentis, tuſſiendo ejectis, mentionem facit *Tulpius* (a). In Aphthis ſimile quid contingere, ex mucoſis non tantum, ſed & membranosis, quæ eructando per os ejiciuntur; & per inferiora, cum alvinis fecibus excernuntur, haud temerarie concluditur. Obſervationes in nupera, quæ in Anglia primum, dein etiam Pariſiis graſſata eſt Angina gangrænosa, vel ſtrangulatoria, factæ; quæ ex præclari CHOMELII & egregii FOTHERGILII tractatibus de hoc morbo conſcriptis, videri poſſunt (b); id multis argumentis confirmare poſſunt. In hac Anginæ vel Aphtharum ſpecie, de cruſtis Faucium interiori ſuperficie ad hæ-

(a) *Tulp.* Obſerv. pag. 294.

(b) *Chomelii & Fothergilii* tractatuum excerpta leguntur in Diario Eruditorum, *Journal des Sçavans*, 1749 Novemb. pag. 333. &c. 1750 Juin pag. 379.

Morbus haud immerito aphthoſus dici poſſe videtur. Journ. des Sçav. 1749. Nov. pag. 345; vel Pædanchone a *Severino* deſcripta, *Hall. Meth. Stud. med.* Tom. II. pag. 957. *Severinæ*. de recondita Abſceſſ. nat. pag. 513.

hærentibus, labentibus iterumque de novo prodeuntibus; de ulceribus malignis, magis minusve profundis, exinde natis; de Narium hæmorrhagiis, ex erosione Membranæ pituitariæ ortis; quibus haud raro Vomitus & Diarrhoeæ fuerunt comites, frequentissima fit mentio. Inprimis huc quadrant quæ de morbo strangulatorio, memoratam Anginam epidemicam vehementiâ & malignitate multum superante, cum Societate regia londinensi communicavit doctissimus J. STARR. Ille enim in principio morbi pelliculas ex Oris interni partibus abscedentes vidit, quasi gangræna affectas & separatas, aliquando cum ingenti Muci glutinosi copia iis tenaciter adhærente. In alio ægro, puero decem annorum, morbo ad statum magis appropinquante, ingentem membranæ partem, a Velo palatino separatam, materie mucosa non pauca adhærente; & præterea, integrum mucosum tubulum Laryngis & asperæ Arteriæ maximæ divisionis & ramificationis Bronchiorum, ab eodem ægro rejectum, vel ex ore paterna manu extractum, delineat; Respiratione exinde facta difficili, & brevi post suffocata penitus (a). Immo vero quod magis forte mirabile cuipiam videbitur,

(a) Philosophical Transact. N. 495. pag. 435.

bitur, Febrem lentam habitualement ex præternaturali Ventriculi intime denudati sensibilitate nimia originem sumere posse ab illustri FR. HOFFMANNO adsertum videmus. Ejus verba maxime memorabilia hæc sunt: „Quæ ab Intestinorum & Ventriculi erosione accidit Febris lenta tamen bescens, omnia acria falsa, acida, stimulantia, ceu venenum experitur; ipsum rhenanum vinum, propter acorem non fert; dulcia etiam & fermentescibilia, nec non omnes difficilioris solutionis cibi, eandem exacerbant. Cura vero difficillima est, nec alia poscit, quam demulcentia & roborantia (a)“. Quisquis est, ut ad vulgaria tandem provocem, quin experientia quotidiana in se ipso didicerit, narium Muco, dum Coryzam contraxit, tenui facto, vel membranæ intimæ, sufficiente copia non adhærente, internam Narium superficiem, cum dolore excoriari.

§. XII.

In Stranguria visibiles.

Si ad Stranguriam attendamus, in qua si longa est, insignis sæpe excernitur, inter maximos cruciatus, Muci a Vesica ab-

(a) Hoffman. Med. Rat. System. Tom. IV. Sect. II. cap. 13.

abscedentis copia, vias urinarias & Vesicam in statu sano oblinientis, & contra acrimoniam lotii defendentis; eadem hic ac de Dysenteria & Tenesmo antea dicta sunt, accidere videbimus. Mucum pituitosum, cum urina, magnas inter molestias ejectum, tenacissime cohærentem, veræ quasi membranulæ forma, matulæ majoris fundum penitus obtegentem, diris inter mingendum cruciatibus ansam dedisse, in id usque tempus distentis, donec urina mera, Muco intus restitante denuo emitteretur, quam sæpe cum miseratione vidi ipse & alii! Morbus ut molestissimus & difficilis curatu, multa cum Tenesmo Intestini recti, inde forte non male Tenesmus Vesicæ dicendus, quod ad Symptomata & causas communia habet.

§. XIII.

Videmus itaque ex iis quæ dicta sunt Conclusio
hactenus, quibus & multa alia si opus assimila-
esset, facile potuissent adjungi; quascun- tionis,
que partes organicas admittendis vel trans-
mittendis cum solidis tum liquidis, non
naturalibus, naturalibus & excrementi-
tiis adaptatas & destinatas, Muco suffi-
ciente in statu sano defensas, ob ejusdem
materiæ mucosæ vel depravationem vel
defectum multa mala pati. Hinc varia &

22 DE COLICA PICTONUM

longe ab invicem diversa Symptomata, a structura & usu partium diverso dependentia; in Dysenteria & Tenefmo tormina Ventris & cruciatus infestissimi, in Ventriculo Cardialgia, in Vesica vel Meatu urinario Stranguria, in Faucibus vel Deglutitionis vel Respirationis difficultas vel impotentia; prout Oesophagus, Arteria aspera aliæve partes affectæ fuerint.

§. XIV.

Antedictorum applicatio ad Colicam.

HÆC si ad *Colicam* nostram applicentur, verosimile, ut mihi quidem videtur, unicuique apparebit; acerbissimos in hac dolores, ejusmodi ac de Dysenteria, aliisque morbis jam demonstrata est, vel non multum dissimili Intestinorum conditioni, ceu causæ proximæ, originem debere. Supponamus, illustrationis gratia, in Intestinorum tenuium certa quadam parte, Mucum, eorum latera lubricantem, ex folliculis glandulosæ, vel si magis placeat denominatio, nervosæ vel cellulosæ membranæ deficere, vel præternaturaliter esse constitutum, tenuem nimis, minusve, quam decet, se lateribus Intestinorum agglutinantem (a); sive causa quadam

(a) Ne miretur quisquam, me in tenuitatem Muci folliculosi culpam convertere, cum de ramentis
cras-

dam violenta abrasum; quæ exin contingere debeant, facile est prævidere. Nuda relicta interior tunica sensu acutissimo prædita, membranarum ad invicem frictione primum, dein ab omnibus canalem pertranseuntibus, ingestis, secretis, duris vel acribus quibuscunque, dolore afficietur intensissimo. Denudationem, si diutina sit, quia nunquam non partes Intestinorum internæ vel ad invicem vel ad contenta moventur, & perpetuas frictiones patiuntur, necessario sequetur villosæ Tunicæ excoriatio, erosio, Intestinis, præ aliis partibus omnibus, maxime sensibilibus, dolorem inferens. In omni corporis parte Epidermide denudata, a levissimo non acrium tantum quorumvis, Aceti puta, vel Salis cujusdam, sed & blandissimorum corporum attactu dolorem experimur; in Intestinis vero ea ratione acriorem qua sensum habent sagacior. Quoties contingit in homine, post
vio-

crassis & Pituita tenaci, quæ adduxi exempla loquuntur. Mucum etenim nimis tenum esse posse, quam ut lateribus agglutinetur, eundemque nihilominus extra corpus ejectum, tenacis pelliculæ formam inducere Stranguria, longa inprimis docere potest. In hac, cum urina homogenee mixtus & profluus mucus, non nisi turbulentia quadam detegendus emittitur: perfrigerata vero urina, ab ea secedens, urinæ fundum, crusta mucosa, tenaciter cohærente, tegit. Vid. exemplum ad finem Tentaminis.

24 DE COLICA PICTONUM

violentas nimis alvi Purgationes, ut cum *Ruischio* loquar, tegumentum Papillarum intestinalium deglubi a Papillis subpositis, tum vero cruciatuum infestissimi corpus aggrediuntur (a). Ideam certe *Colici* doloris Menti imprimunt ad hæcce attendenti, si quæ ulla sint, quæ morbi aliquam imaginem efficere possunt. Mirum itaque videbitur nemini hæc perpendenti, Dolores colicos infestissimos ex ejusmodi causa, in Intestinis existente, nasci, eosque ab acribus, calefacientibus, irritantibus, simulac Intestinorum denudata latera tetigerint, immaniter augeri; demulcentibus e contra, oleosis emollientibus leniri, ut in externis excoriationibus simili modo observamus. Congruit cum dictis observatio laudati antea (S. X.) *Simsonis*. De illo etenim viro, dum in vivis esset, sequentia notatu dignissima memorantur. A longo tempore nihil quicquam, quod solidum erat, adsumferat, præ intenso Ventriculi & Intestinorum dolore, a tantillo horum ingurgitato. Tribus ultimis ante obitum hebdomadis nil nisi aliquando pauxillulum aquæ puræ, quantum cochleare capit, lente forbillando hauserat; cujus singulæ guttæ ardoris sensum, quasi a candente pruna,

(a) *Ruisch* Adversar. Dec. II. pag. 26.

na, ut ipse se exprimere solebat, in Ventriculo excitabant. De valetudinaria muliere, villosæ Tunicæ intestinorum fragmenta cum fecibus alvinis ejiciente, cujus etiam jam antea (§. VIII.) mentionem injecimus, idem Auctor memorat; ipsam a longo tempore sensilissimum habuisse Ventriculum, adeo quidem, ut summa cautione deglutienda quævis exploraret, ab omnibus fere dolores intensissimos statim post ingestionem pati solitam: exactissimam, quam observare cogeatur Diætā, maximum ipsi quidem præstitisse solatium, morbo interim non nisi morte terminato. Quam similes sunt *Colicæ* nostræ dirissimi cruciatus, ab ingestis non tantum omnibus, momento citius post ingurgitationem exacerbati, doloribus horum ex denudatione intimæ Intestinorum Tunicæ, autoptica inspectione detecta, natis! Adde quod *Colicam*, biliosam dictam, ex Dysenteria antegressa ortam observavit *Sydenhamus* (a); non levi indicio, excoriationes, post diuturna tormina a Dysenterico morbo, relictas fuisse, colicis postea doloribus, a bile, ex arbitrio magni viri, deducendis, ansam præbentes.

§. XV.

(a) *Sydenh. Oper. pag. 207.*

§. XV.

Ex natura
Tunicæ
villosæ a
Monroo
demon-
strata, il-
lustratio.

Ad faciliorem intellectum eorum, quæ dicta sunt, haud parum forte conferre poterunt quæ a clarissimo *Monroo*, de Membranæ intestinorum villosæ natura, in citatis jam pluries Actis Edinburgen-sibus tradita leguntur. Tunicam hanc villosam, Intestina, Ventriculum, Oesophagum, Fauces, Linguam, totumque os interne obtegentem, Cuticulæ, externi corporis superficiem investienti, structura omnibusque fere characteribus similem esse ostendit, ni unam omnino eandemque continuatam membranam. Similium utriusque præcipuarum conditionum considerationem paucis ex Celeberrimi viri dictis addere lubet.

1. Utraque Membrana nerveas productiones supervestit; utraque tamen pervia est, liquoribus exeuntibus introeuntibusque: imo tangentibus corporibus ad Nervos subjectos penetrandis patulam factis viam libertatemque concedentes.

Alterutra abrasa partes subjacentes non sensiles sed dolentes redduntur.

2. Aquei, tenues liquores vel quæ salia soluta continent Lixivia, Cuticulam destruunt; mucaginosa tenacia eandem contra dictorum actiones, aliorumque corporum absumentes frictiones defendunt; quam

quam ob causam istis locis ubi maximis frictionibus exposita est, maxima etiam copia, mucaginofam suboleofam vel sebaeam materiem propriis organis fecerni & excerni videmus. Eodem perfecte modo Intestinorum Membrana intima, in statu sano, muco glutinoso satis copioso oblinita & defensa est; necessitate id æquali jure exigente.

Aquosorum, acriorumve liquorum abusus Morbos a Tunica villosa oriundos inferre potest.

3. Cuticula externa frictione, eandem non destruyente, indurescit, & crassior redditur, ut ex infuetis laboribus quotidie videmus. Simile quid, compressione, in Membrana villosa contingere, docent observationes de solidis non naturalibus corporibus, vel naturalibus præternaturaliter autem concretis substantiis, longo tempore in Intestinorum parte seclusis; eorum membranas eo loco induratas & callosas facientibus (a).

4. Epidermide a Cute abrafa, humorum

(a) Hujusmodi crassitudines vel callositates in Oesophago obortas, viam deglutiendorum arctantes, Famis lethalis causam fuisse exempla sunt, quæ docuerunt. Act. Physico Med. Naturæ curiosor. Vol. VI. pag. 270. J. E. F. Bulif. Disputat. de Fame lethali ex callosa oris Ventriculi angustia, indicat. in Eruditorum Diario. Journ. des Sçav. 1752. p. 222.

rum larga copia ex cutaneis vasculis effunditur. Idem in Intestinis, Faucibus aliisve partibus accidit, villosæ ab earum superficie interna Tunicæ separatione.

Liquidarum dejectionum in Dysenteria, salivationis in aphthoso morbo scaturiginem explicat præsens observatio.

5. Cuticula a Cute subjacente relaxata, nondum tamen separata, crassior evadit, inprimis quando liquoribus macerata & tumefacta est. Neque id ab Intestinorum villosa Tunica alienum est, ut ex crassis & tubularibus fragmentis, per anum sæpenumero ejectis, manifestum est; vel in Aphthis, excreando per os emissis.

6. Cuticula nec facile putrescit, nec leviori causa exeditur; ut in Abscessu, Gangræna, & applicatione Lapidis septicæ, ad interiora vi destructoria penetrantis, integra relicta Cuticula. Simili conditione etiam Villosa gaudere videtur; neque a tam multis tamque diversis, sub cibi potusve nomine ingestis & applicatis, in maximum vitæ & sanitatis humanæ bonum, facile deteritur, exediturve.

Frequentiores sine hac Villosæ conditione essent Intestinorum morbi a vitio hujus tunicæ oriundi.

7. Utrique tandem vel id commune est, dum separantur facile, citissime quoque

que, præ omnibus aliis corporis, alterius structuræ, partibus, regenerentur, adlatumque a denudatione damnum restituant (a).

Hinc morbi & Dysenterici & *Colici* subitanea sæpe curatio.

Ex hisce, nisi fallor, evidentissime apparet, quæ antea de Membranæ intestinorum villosæ denudationibus vel excoriationibus ejusdemque redintegratione, ex observatoribus adducta fuerunt, multaque alia hisce similia, vel in colico vel in dysenterico morbo observata, vel observanda deinceps, non irregulares & oppido raros esse casus, vix ab uno alterove animadversos; sed ut reipsa visos, etiam ex natura Villosæ perspecta oriri facile posse: stabilitamque hypothesin, de doloris pictonici causa proxima, vero simillimam, ne dicam indubitatam reddi.

§. XVI.

De Dolore *Colicæ* nostræ in genere me nunc satis superque demonstrasse opinor, quomodo ex mucosæ Intestinorum materiæ defectu vel abrasione oriri possit. At tamen quoniam & alia Morbi symptomata sunt, quæ non individui quidem comites, *Colicæ* sympto-
matum ex
eadem
causa pro-
xima ex-
plicatio,

(a) Medical Ess. Edinb. Vol. IV. pag. 80,

30 DE COLICA PICTONUM

mites, hoc nihilominus vel alio tempore, ut *Colicæ pictonicæ* sequaces ægros molestare solent; ea quoque, quod facile fieri poterit, ex antedictis resolvenda constitui. Præcipua sunt, quæ sequuntur.

1. Quod ad dolorem ipsum, illum non sine intermissione sævire, sed per intervalla ire & redire, idque *Colicæ* cum Dysenteria & Tenesmi doloribus commune esse, antea (§. VI. 2.) monuimus. In utroque morbo varietatem hanc, vel ab affectione ingestorum non naturalium sive inquilinorum, ob facilem vel difficiliorem transmissionem, majore minoreve acrimonia denudatas vel & excoriatas simul partes confricante; denique a Muci abradi pro tempore restitutione, novaque iterum abscessione, facile deduci posse quisque concedet.

2. Ab omnibus plerumque quibusvis ingestis, mitioribus, durioribus dolorem subitissime exacerbari (§. XIV.) antea dictum est. Nuda quoniam sensilissimaque Membrana intestinorum intima, nullum a peregrino corpore tactum sine dolore ferre potest; ut in Cute epidermide denudata quisque experitur.

3. Leviores in principio Morbi accessiones esse (§. VI. 3.) sensimque in graviores mutari facile percipitur. Muci quippe glutinosi & suboleosi defectus vel tenuitas,

tas, primo suborta sensilitatem quidem & dolorem infert, eo autem meliori reddito aut redintegrato, doloris sequitur immunitas: sæpius autem abrafo, vel non factis cito restaurato, excoriatio contingit, graviorum torminum causa procreatrix.

4. Alvi egestionem, quibus pertinacissime intercipiuntur, (nam in initio Alvi quidem frequens, sed non adeo copiosus fluor aliquando adest) ex eadem origine deducere in promptu est. Præ dolore, nempe, sævissimo constringitur tota intestinalis fistula variis locis, transeundorum motum deorsum intercipiens. Tenesmus quidem, ac in Dyfenteria non oritur, sed perpetua tamen, in multis, alvi egerendæ cupido, a dolorum exinde sperato, minime impetrato levamine instigata; toties quoties deceptis. Imo vero Tenesmo, in quibusdam, non absimile quid, irriti nempe, perpetui tamen ad exonerationes conatus involuntarii; prout pars affecta Intestino recto propinqua vel ab eo remota fuerit magis. Sic & Flatuum detentiones, de quibus perpetuæ in omnibus querelæ, ex memorata conditione ortum habere extra omne dubium est. Adde, quod deficiente Tubi intestinalis lubricitate, ad facilem transitum adeo necessaria; quæ intus contenta sunt, viæ duritate vel aspredine retinentur; motu pe-
ri-

ristaltico jam labefactato, vix propelluntur. Imo vero hunc lubricitatis defectum, & constipatam, hac de causa, alvum; dolorem colicum anteire, morbumque invasurum præfagire, ægrorum multi propria observatione docuerunt; ex Alvi subita & insueta constipatione hostilem assultum expectantes.

5. Doloris in determinato Ventris loco constantia, vel ab uno in alium translatio, ab affecto vel uno vel plurimis simul Intestinorum locis dependere videtur.

6. Nausea & Vomitiones fere continuæ (§. VI. 4.) a spastica, præ dolore, Intestinorum seclusione & inverso hinc motu ortum habent.

7. Quibusdam dolor circa umbilicum firmiter hæret; hisce Ventris introtractio propria est, & dolorum summa ferocitas: quoniam Intestina tenuia, in quibus Morbi sedes in hisce magis fixa quam aliis, præ crassis sensibilia sunt.

8. Vigiliæ, Deliria, Aurium tinnitus, Convulsiones, Cœcitas, Paralysis, & quæ plura hujusmodi morbum hunc vel concomitantur, vel sequuntur (§. VI. 5.) nervosi generis symptomata; ex vehementia doloris, consensu difficile explicando, unice derivanda. Quam facile ex Intestinorum torminibus Convulsiones oriantur, docent Infantum lactentium morbi.

bi. Paralyfin a multis pro Crisi hujus morbi, perperam tamen haberi a multis jam observatum fuit; quum apud plures *Colica* affectos, Paralyfi jam oborta, dolores eodem, quo antea, furore sæviant, aut si quandoque remiserint paucillulum, brevi post, nova & quasi redintegrata ferocia recrudescent (a). Mirabilis illa Ventriculi Intestinorumque sagacitas in diagnoscendis iis, quæ corpori humano inimica sunt, & quæ adeo validas convulsionem concitant, ut sursum & deorsum hostem eliminant; vel fibræ omnis ad hostilem acrimoniam præsentanea contracti-

(a) Id jam annotavit clarissimus *Rega*, Iovanien-
 sis Professor: „Evidens“, inquit, „est Intestino-
 „ rum cum toto genere nervoso sympathia. Condō-
 „ lent enim omnibus nervosis partibus, & hæ vi-
 „ cissim illis. Infantum tormina in Epilepsiam cede-
 „ re, indies observamus. — Intestinorum dolor
 „ trahit in consensum alias partes, easque vel perti-
 „ naci Paralyfi resolvit, vel constanter contrahit, sed
 „ eas præcipue, quæ motui inserviunt. Frequens e-
 „ quidem est in Praxi, Paralyfin *Colicæ* intentiori,
 „ quam *Pictonum* vocant, supervenire“. Quin Pa-
 ralyfin unius lateris, cum Aphonia, brachiique con-
 tractura molestissima, ex torminibus vehementissimis
 a Jalappæ Resina & Tartaro vitriolato ortis, idem
 observavit. De Sympath. pag. 206. 208. Cujusmodi
 observationes ex aliis Purgantibus, ut Scammoneo vel
 alio, apud Auctores passim inveniuntur. Dicta hæc
 Sympathia *Hippocratem* vel alios veteres scriptores non
 latuisse videtur. De Humor. ad fin. Epidem. Lib.
 VI. Sect. 4.

tractilitas, etiam post mortem superstes (a), & ab acri admoto easdem convulsiones excitans, hic molestissime affecta, omnes systematis nervosi vires, in sui subsidium quasi excitare videtur, vel simili quodam ingrato sensu afficere.

§. XVII.

Prognosis
incerta.

DE Morbi eventu, ut ad alia nunc progrediamur, nil nisi quod incertum dubiumque est, pronunciari potest: tecta quippe & ab oculis remota Morbi conditio est. Experientia ex multiplici Morbi observatione nata, sola consulenda est; quæ causæ proximæ explicatione jam tradita, utcunque forte juvari poterit. Generatim Regulis quibusdam quæ præcipua sunt, comprehendi possunt.

Morbus
difficilis
est curatu.

Morbus, ut infestissimus ægro, sic difficilis curatu Medico est.

Difficile est quoscunque morbos a Muci lubricantis vitio genitos percurare; Muci inprimis depravata conditione, vel defectu, a vitio glandularum fecernentium dependente. Muci simplex abrasio difficulter restituitur; quia quæ ad reintegrationem, vel deficientis suppletionem

(a) Prælectiones Boerhaav. Vol. I. pag. 279. Hall. ibid.

nem artificialem requiruntur, haud commodè ipsi loco dolenti, sine commixtione, (viriumque ita deperditione) cum aliis in intestinali tubo contentis, applicari, multoque difficilius retineri, quam diu necessitas exigit, queunt.

Curata *Colica* facile recidivat. Sæpe recidivat.

Muci naturalis morboſa conditio sublata redit; cauſæ abradentes de novo incidunt; Excoriationes reſtauratae denuo oriuntur: hinc novæ, prioribus in omnibus ſimiles tragoediæ.

Morbi periculum determinat Intestino- Ex Symptomatibus
rum dolores excitans peculiaris conditio. de ſtatu

Leviſſima *Colica* & maxime curabilis illa erit, quæ a leviori Muci folliculoſi ſeu abraſione, ſeu vitio orta & incipiens eſt; Muci ſola abraſio vel leviuſcula depravatio benignitate naturæ ſponte reſtauratur. Pejor erit, in qua Membranæ intimæ excoriatio adeſt; non niſi Membrana renata evaneſcente. Peſſima tandem, ſi Ulcera Intesti- judicium eſt for-
mandum,
norum ſubſtantiam erodentia jam nata fuerint; Hæc perpetua ſorditie excrementitiorum ſpurcata, maligna ſæpe facta, curationem vix admittere videntur. Peſſima Intesti-
norum conditio peſſima quoque concomitantia ſymptomata ſecum ducit; Vigili-
as, puta, Deliria, Convulſiones & ejus generis plura; quare & ex hiſce de Intesti-

36 DE COLICA PICTONUM

interno statu & morbi periculo, judicium ferri tuto potest. Facile cuipiam v. g. erit concludere, *Colicam pictonicam* Convulsionibus aliisque nervosis affectibus, sæpe redeuntibus stipatam, magnis excoriationibus, vel & Ulceribus in Intestinis jam abortis originem debere, nec nisi morte terminari.

Morbus
nulla eva-
cuatione
critica solu-
bilis.

Morbus nulla evacuatione critica solubilis esse videtur. A quibusdam magnis viris, Alvi spontaneum & liberale profluvium; vel Hæmorrhoidum aut Mensium exsolutionem, aliasque hæmorrhagias; vel Sudores copiosos, eum aliquando solvisse & sæpeolvere, dici scio: ipse observare nondum potui. Per pustulas vel ulcuscula in extremo pede suborta, in nostra saltem Regione, vix unquam judicatam fuisse, experimentorum rara mentio confirmat. Quæ de pustulis cum sudore benigno erumpentibus, morbumque levantibus, in morbo colico epidemico, narrat *Huxhamus* (a), in nostris regionibus a quopiam rite & sufficienter observata esse non liquet: immo & raro a clarissimo viro visæ videntur. De Intumescencia manuum pedumve vel circatalos oborta, rara quoque, Arthritide introversa forsan excepta, idem mihi esto ju-

(a) *Huxham* de Morbo col. pag. 8.

judicium , usquedum pluribus exemplis meliora sim edoctus. Neque per ejusmodi evacuationes criticas morbus sua natura solvi posse mihi videtur, nisi respectu causæ antecedentis solo ; quæ in multis obscura & incognita penitus, quam evacuatione terminetur dici a nemine potest ; vel, quod plus est, ipso sui genio evacuationem criticam dictam non admittit: ut v. g. Venena, vel venenata ingesta, infectiones ex vaporibus vel halitibus corpori humano inimicis; ut in plumbariis, pictoribus, aliisque artificibus, quibus hic Morbus præ aliis familiaris creditur. Vera nihilominus Auctores tradidisse credo, eorum neminem falsitatis arguere tantilla animo infidet cupido. Ipsos *Colicam* pictonicam, supervenientibus quibusdam evacuationibus terminatam vidisse, assumo. Etenim verissimum est, quo citius, post pertinacissimam constipationem, alvus spontanee solvatur, vel sudores erumpant copiosi, eo citius morbum abiturum esse; non, juxta meam quidem sententiam, quia hæc morbum solvant, sed quatenus indicium præbeant, corpus a morbo liberari, spasmodicas constrictiones, vehementia doloris ortas, omnesque cum Secretiones, tum Excretiones turbantes & impediētes, jam solvi incipere ; dolorum causam imminui,

38 DE COLICA PICTONUM

& vel integre aut pro parte sublatam esse.

Neque
Caloris
vel Frigo-
ris in eum
effectus
satis per-
specti.

De Calore & frigore ejusque ad morbum vel auferendum vel inferendum virtute, nihil nisi quod dubium & incertum quoque est, statui posse videtur. Licet enim hyems, propter frigus morbo inimica ut plurimum observetur; videmus tamen, haud raro, vel media æstate morbum invadere. Vidi difficillimam *Pictonum Colicam*, omnibus omnino Remediis, a me, aliisque præstantissimis Medicis adhibitis resistentem, media gelidissima hieme anni hujus sæculi quadragesimi, sponte resolutam fuisse, neque, quantum scio, recidivasse hætenus.

§. XVIII.

Ad Cura-
tionem
transitio.

CURATIONEM tandem aggredi oportet. Illa semper felicissime absolvitur, causa proxima sublata penitus, vel iis quæ ipsi contraria sunt, extincta. Hac vero in profundo latente, unde haurienda sunt ad causam vincendam idonea? Misertus sæpe ægrorum meorum, dirissimo cum morbo luctantium, precibus, vociferationibusque opem ac medelam efflagitantium, quæcunque fere in animum incidebant, molitus sum, spem, (quam sæpe frustratam!) alens, inter multa incassum
ad-

adhibita, me quicquam reperturum, quod huic miserorum hominum infestissimo hosti, ceu specificum cum fructu opponi posset. Quosvis, qui mihi ad manus fuerunt, pervolvi Auctores, ab antiquissimis ad recentiores imo recentissimos non tantum omnes. Quæ aliquam specifici simulationem ferentia, vel specioso titulo commendata inveniebam, hilari animo arripiens, statim institui; eventu vero frustratus, omnem nonnunquam spem penitus projecit, morbum ut incurabilem, vel non nisi casu fortuito sanabilem existimans. Neque alios quibuscum versatus fui Medicos, vel ad quos, propriam impotentiam ad vincendum morbum experientia edoctus, relegavi ægros meos, feliciores vidi. Quisque equidem, ex opinione præconcepta, morbum Bili, Scorbuto, Febri, aliisque originem debere supponens, sua propinavit, vel nullo vel imperfecto admodum successu; claro indicio, certam tutamque curativam methodum nemini perspectam esse.

§. XIX.

In huiusmodi rerum angustiis, ut Me- Empirica
dicum decet facere quæ potest, præstiti curatio,
ea, quæ tanquam optima usu comprobata se commendabant. Ea semper fuerunt

40 DE COLICA PICTONUM

Demulcentia & Opiata; quibus sat magna copia exhibitis & assumtis Morbus sæpe satis cito & feliciter ad speratum finem fuit perductus; sæpe vero ne tantillum levatus, omnem anodynorum vel maxima copia exhibitorum potentiam eludens. Ægris quidem levamine gauden- tibus hæc methodus perquam grata, mihi nunquam satisfaciens; utpote empiria tantum, nullo fundamento nixa, Morbo vincendo in compluribus impar, veram curationis indicationem aut regulam sug- gerebat nullam. Quare istam in nova cu- ratione deferens, quaquaversum circum- spiciens aliam semper quæsiui, frustra- neis licet conatibus; dum illa, expe- rientia duce, sola, vel nulla certa tuta- que restitabat cognita hætenus: neque penitus spernenda, ut statim patebit.

§. XX.

- | | |
|--|--|
| <p>Curatio-
nis me-
thodus
causæ pro-
ximæ su-
perstruc-
ta.
Indicatio-
nes qua-
tuor.</p> | <p>Curationis methodus, causæ proximæ in antecedentibus traditæ & stabilitæ su-
perstructa, usuque comprobata, quatuor
Indicationibus absolvitur. Expostulat,</p> <ol style="list-style-type: none"> 1. Lenimen doloris, nulla habita ad causam specialem ratione. 2. Causæ proximæ vel ablationem vel extinctionem. 3. Partium affectarum in integrum, quan- |
|--|--|

quantum fieri possit, restitutionem.

4. Alvi interea temporis, difficillime in plerisque constipatae, toto curationis decursu, exsolutionem.

§. XXI.

Ad primum quod attinet (§. XX. 1.) Prima Indicatio Anodynorum dosis, & continuanda diu: parca etenim vel non satis diu continuata, morbum quidem levat, imo quandoquidem vix levat, ne-tiquam subigit. Idem quod in dysenterico morbo, a Principibus in arte nostra viris fere omnibus adsertum sæpiusque incul-catum legimus; in Dysenteria nempe, præ aliis ullis morbis opiata liberaliori dosi secure exhiberi posse, fractis licet & pene attritis viribus; Dysenteriae cura-tionem solo Laudani usu sæpe absolvi, largiori tamen; gravioris Dysenteriae sa-nationem sine Opio aggredi non debe-re (a), & quæ similia sunt, in *Colica* nostra observamus. Placidissima simul & diuturna quies, ut omnes Secretiones mor-bose turbatas instaurat, ita & hanc de qua Intestinalis Muci integritas depen-det,

(a) Videantur instar omnium *Sydenh.* Oper. pag. 189, 531, 602. *Ramazzin.* Oper. pag. m. 113, 114. *Trall.* Exam. rigoros. pag. 168.

42 DE COLICA PICTONUM

det, restituit; & proin mirum quantum ad sanationem confert. Quin hac sola methodo morbum aliquoties integre sublatum viderim. *Opium* crudum, vel quovis usitato modo præparatum, dein & *Papaverina*, mane & sero, per plures dies, iuxta dosi propinata, id negotii absolvunt.

§. XXII.

Secunda
Indicatio
Demul-
centia re-
quirit.

Secunda Indicatio (§. XX. 2.) talia requirit quæ causæ proximæ opposita, eam vel auferre vel emendare valent. Id præstant ea quæ Muci folliculosi defectum supplere, denudationes vel excoriationes Intestinorum Tunicæ intimæ artificiali quasi glutine obducere, spasmodicas exinde ortas constrictiones relaxare, & ita sensilitatem minuere apta nata sunt. Qualia sunt quævis lubricantia, involventia, incrassantia, emollientia; uno verbo demulcentia, lentore proprio Intestinorum lateribus se agglutinantia, neque facile a præterfluentibus semovenda. Hujusmodi sunt,

1. Interna.

1. Interna, *Oleosa*; ut *Oleum Amygdalarum* recenter pressum, *Olivarum*, *Raparum*, *Lini*, vel sola, vel cum Syrupis quovis permixta & edulcorata. Sequuntur *Mucilaginosæ*, ex gummosis in aqua

aqua solutis, ut est *Tragacantha*, vel *arabicum Gummi*; ex *Radicibus* emollientibus mucaginosi extracta, *Althææ*, *Symphiti*, *Salab*, exoticæ radicis nostris temporibus celebris, cum aqua vel vacino Lacte præparata; ex Seminibus *Psyllii*, *Cydoniorum*; & *Ichtiocolla*. Dein huc quoque referri merentur Farinosa, Terrea pingua friabilia, ut *Amyli* pulvis, *Salab* in pulverem contrita, semina *Cucumeris* aliorumque fructuum quæ frigida dicuntur, non rancida, pulverata; *Bolus armena*, *Terra lemnia* vel *sigillata*, & similis generis plura. Hæc larga satis copia, & diu ingerenda sunt, quod maxima parte, Intestinorum contentis permista & hisce mediantibus, peristaltico motu vigente, deorsum, de loco saltem in locum continuo moveantur & depellantur.

2. Externa, inter quæ jure merito primum locum teneant, quæ Clysmatum forma in Intestina injiciuntur. Hæc, si oleosa, vel mero oleo constantia, modica quantitate, ut facilius retineantur, sæpius instituuntur, mirabilem sæpe effectum edunt, imo sanationem aliquando absolvunt. Solis etenim Enematibus oleosis, quibus quandoque Unguenta, majoris spissitudinis ergo admiscui (Adipem anserinum vel gallinaceum admisceri vult

2. Externa.

Pau.

44 DE COLICA PICTONUM

Paulus Ægineta (a)) singulis, alternis, quaternisve diebus repetitis, ægros curavi, quando alia cujuslibet generis medicamenta, interna æque ac externa irrita fuerant (b). Huc pertinent quoque Balnea vel naturalia vel artificialia, tepore humectante, Intestinis amico, constricturas relaxando, dolores emollientia læsasque partes blande demulcentia. Fomenta quoque ex lenientibus & demulcentibus composita; qualia sunt Decocta herbarum emollientium, cum aqua vel Lacte; quibus Sapo venetus, vel oleum quodcumque blandum non inutiliter admiscetur. Ex iisdem vel similibus Cataplasmata, farinosis quibusdam additis, in pultis spissioris formam redacta, constitui possunt. Præ omnibus autem Omentum recens mactati ovis, vel alterius animalis, ca-

(a) *Æginet. Lib. III. cap. 43.*

(b) Testis inter alios esse potest celebris inter nostrates Bibliopola I. T. bonarum literarum propagator; qui, annis jam aliquot præterlapsis, non sævisimos quidem, satis tamen acutos hujus *Colicæ* passus fuit Accessus. Incaßum adhibitis omnibus a me, aliisque clarissimis, quos consuluerat Medicis, tandem meo suafu, hac methodo feliciter liberatus est. Iliacum affectum, a *Colica* nostra non multum abludentem, per decennium vexantem, Enemate ex solo Lini oleo, & panno laneo, oleo Lini imbuto, calide toti abdomini imposito, maxima parte sanatum legimus. *Commerc. Literar. Nor. 1743. pag. 198.*

calide abdomini applicatum, vel si frigerit, in Lacte calido denuo tepefactum, laudatur & experientia comprobatur. Catuli recenter nati, Ventri impositi, perpetuam, blandam, & æquabilem teporem, ægris gratissimum, adferunt; quorum usus multum solatii adtulit quibusdam ægrotorum meorum, hacce *Colica*, anno MDCCXXVII ex Febre intermittente, quæ tunc temporis epidemice grassabatur, nata, decumbentium. Immo & Oleorum inunctiones, nec non Epithemata ex spirituosiss & oleosis stillatitiis aliquando profuisse reticeri non debet. Fomento ex vino rubro generoso immixtum fuisse dolorem, observatio apud *Citesium* (a) docet.

§. XXIII.

Tertiæ Indicationi (§. XX. 3.) ut satisfiat ipsum læsarum vel lædentium vitium corrigi & instaurari debet; hoc est, Muci intestinalis vel vitiata secretio, vel aquosa nimis tenuitas, vel leviori quam decet causa abscessio restituendæ sunt. Difficillimum hoc sane opus est, eandemque ob causam difficillimus curatu morbus. Muci glutinosi vitiata secretio quomodo
per

(a) *Cites.* de Dol. col. picton. pag. 233;

46 DE COLICA PICTONUM

per medicamenta mutari directe possit, non video. In peculiare secretionem, a peculiari partium fecernentium organica constitutione dependentes, ars vix quicquam valet. Generaliori methodo aliquid ad instigandum, motum vitalem nempe Medicamentis stimulantibus augendo, possumus, quatenus motu circulatorio per totum corpus accelerato, etiam in singulari parte & organo citatior reddatur. Secretionem autem huius glutinis in morbo nostro augeri debere minime certi sumus. Ex antedictis licuit, *Colicam pictonicam* stimulantibus, calefacientibus, & proin motum in toto & in parte augmentibus exacerbari. Imo vero in mucosorum & sebaceorum secretionibus tarditate potius quam acceleratione opus esse, ut debitam consistentiam nanciscantur secreta, docent theoretici hodierni, uno ore omnes; docet frequentissimus Coryza morbus, ubi levissima, ex suscepto frigore, & impedita universi corporis perspiratione, in Narium membrana suborta Inflammatione, secretio materiæ mucosæ acceleratur quidem sed & tenuior effluit, agglutinationi & defensionis, ut in statu sano, ineptus. Evidens itaque est ratio, calefacientia omnia *Colicæ* nostræ adversa esse; causam proximam augere, omniaque exinde oriunda symptomata incitare; quamquam

quam obscurissima mihi olim aliisque visa fuit. Secretioni Vitiatae & majori quam decet humoris lubricantis tenuitati, ut & leviori de causa abrasioni simul prospici posse mihi videtur talibus, quæ sine calefaciendi stimulo, roborant & adstringunt. Suadet hanc methodum horum Remediorum successus in aliis mucosæ materiæ tenuioris vel abrasæ vitiis, qualis Mulierum albus Fluor est, (ut ex celebratissimo *Helvetii* pulvere notissimum est,) Gonorrhœa non virulenta virorum, Muci ex vesica præternaturalis excretio, & quæ inde sequitur Stranguria molesta vel Vesicæ tenesmus (*a*), sine fortioribus adstringentibus nunquam vincendis; ne dicam de Dysenteria, Tenesmo vel Aphthis, in quibus, Aphthis præcipue, a Veteribus fere omnibus adstringentia ubique laudata inveniuntur. Suasit tandem mihi horum usum exoptatissimus in ipsa *Colica pictonica* eventus. Horum Remediorum magnus quidem numerus; præcipua intentioni satisfaciencia sunt: *Radix Tormentillæ*, -- *Pentaphylli*, *Cortex Cascarillæ*, -- *Cinnamomi*, -- *Peruvianus*, *Millefolii* herba, -- *Plantaginis*; *Succus Catechu*, -- *Acaciæ*, *Sanguis Draconis*,

(a) Vid. Histor. Stranguriæ, ad finem Tentaminis.

48 DE COLICA PICTONUM

conis, Alumen, Lapis Hæmatites, Crocus Martis, ejusque Vitriolum, & quædam alia hisce similia; quorum quæ majori præ aliis adstringente virtute pollent, Ventriculo & Intestinis amica sunt, ut Cortex Cascarillæ -- Peruvianus, Cinnamonomi Cortex, aromatica virtute cum adstringente juncta nunquam officiens, & Succus Catechu, aliis præferenda, saltem immiscenda; specialius quæ aqua solvi, aut quorum virtutes aqua extrahi possunt, eligenda sunt. Quæ styptica dicuntur adjumenti loco aliis addenda, rarius per se & sola exhibenda. Omnia hæc, vel ejusmodi singula & seorsum, vel invicem combinata, & in diversas formulas Decocti, Infusi, Pulveris, Tincturæ, redacta, prout vel Medico libuerit vel ægri palato acceptum fuerit, exhiberi possunt: imo, eadem, in formam Clysmatis redacta, quando labem in Intestinis crassis hæerere, aliqua suspicio est, cum fructu injiciuntur. Sine his levatio morbi duabus prioribus Indicationibus (§. XXI. & XXII.) impetrata raro tuta fidaque est; hisce solis aliquando curatio integre absolvitur, absque ullo aliorum ex traditis jam Indicationibus præsidio. Siquidem haud raro vidi Morbum Anodynus & Demulcentibus, seorsum & per se, vel combinatis, sat magna copia, & fatis diu

assumtis vinci non potuisse: in quibus casibus, omni spe sanationis impetrandæ abjecta, roborantibus fortioribus non calidis, ut Intestinorum tonus relaxatus emendaretur, adhibitis, invincibilem, ut videbatur, hostem profligari feliciter. Quare hæc methodus sæpius a me tentata deinceps, mihi maxime commendabilis fuit; eoque felicior, quo Medicamentorum adstrictoria potentia major, eorumque propinatio liberalior diuturniorque (a).

§. XXIV.

Tandem ad constipatam Alvum, molestissimum Morbi symptoma relaxandam aliquam operam impendere necessario requiritur. Ad hanc Indicationem serius accessimus, quia Doloris lenimen maximam exposcit festinationem: purgationem enim præfente dolore instituere non licet,

Quarta
Indicatio
Alvum re-
laxantibus
absolvitur.

Ci-

(a) Sic ratio reddi posse videtur *Colicæ* pertinacissimæ, Enemate ex Oxycrato frigido subito curatæ, (adstrictoria nempe hujus Clysmatis potentia) *Chesneau* inexplicabilis. *Chesneau* Observat. med. pag. m. 510. Immo intelligitur in *Colica* ex Pituita vitrea, commodissime per os exhiberi olei vitrioli guttas aliquot, cum haustulo generosi vini mixtas; *Foëll.* Oper. pag. m. 342. Malorum citreorum succo *Cardialgiæ* biliosam dictam percurari, & ejusmodi plura;

Citesio jam monente (a). Sæviente dolore difficile adsumi purgans potest, quin vomitu rejiciatur protinus; Clyisma præ continuo reptatu, perpetuisque fere corporis circumvolutionibus æger vix admittit. Dolore vero vel minimum sedato, vel inducias quasdam faciente, huic indicationi sæpius repetendæ invigilare oportet. Clysmata blanda, non multum stimulantia, in hunc finem, præ internis relaxantibus, eligenda veniunt; quæ si ex oleosis, inter interna Demulcentia æque ac externa (§. XXII. 1. 2.) jam enumeratis composita fuerint, duplex intentio una pariter obtinetur. Oleosa enim, præterquam quod vias lubricent; scybala dura, oleosis optime maceranda, resolvant; etiam spasmodicas constrictiones relaxant.

Internis Relaxantibus. Hæc si votis non respondeant, vel ægrî a Clysmatibus abhorreant, laxativa blanda per os propinare licet. Mitiora semper eligenda sunt; vehementiora stimulantia potentia dolores augendo, quod spasmus clausum est, in strictiorem constipationem incitant. Quæ ex eduliis desumuntur nisi ægro ingrata, vel nausea, ab ingestis facile excitanda assumptionem molestam faciat, optima sæpe sunt. Magna copia prunorum recentium comestorum, quos-

(a) *Cites.* pag. 221.

quosdam recte solutos fuisse, cum antea multis, etiam vehementibus purgantibus; solvi non potuissent; Uvarum recentium larga comestione, Alvum solutam, quæ prius multis adhibitis Remediis expediri ab obstructione non poterat; exempla prostant apud SCHENKIIUM (a); & frequenter observantur. Ex Medicamentis *Tamarindorum* vel *Cassiae pulpa*; in primis autem *Rhabarbarum* feligendum est, quod adstringenti virtute; in Dysenterico morbo & *Colica* nostra, Intestinis amicum, Alvum cum facilitate solvit; præsertim si Infusionis forma satis diluta, parca dosi, & sæpius repetita, sumenda detur. Neque *Senæ* folia spernenda sunt; utpote frigide per duodecim horas infusa, vel & leviter decocta, Ventri cum lenitate solvendo apta. Optime tamen eventus respondet, (quod ut a doctissimo *Huxhamo* (b), ita ab aliis bene multis jam observatum,) quando Anodyna, quorum usus non facile est interrumpendus, cum hisce combinentur: sopito dolore, faciles & largæ utplurimum dejectiones sequuntur.

Notandum insuper, quæ ad singulas Indicationes (§. XXI. XXII. XXIII.) pro-

(a) *Schenck*. Observ. pag. 364.

(b) *Huxham* de Morbo colico. pag. 29.

proposita sunt, non seorsum semper & sola adhibenda, sed majori cum fructu combinanda sæpe esse. Anodyna cum Demulcentibus & involventibus; hæc iterum, vel singula vel combinata, cum roborantibus & adstringentibus conjungi possunt, vel debent; prout morbi natura, vel symptomatum maxime infestantium necessitas expostulare videantur. Alvum Relaxantia omnibus interponenda sunt.

§. XXV.

De Venæ
sectioni-
bus aliis-
que cura-
tionis In-
dicationi-
bus judi-
cium.

De Venæsectione, Vesicantibus, Fonticulis, Cucurbitulis, Vomitoriis, Purgationibus fortioribus, quæ ut optima ad *Colicam* nostram eradicandam a multis laudantur, nullam hætenus injeci mentionem. Etenim non est mihi animus aliorum effata refutandi; mea solum, quæ vel meditatione, vel observatione, addidisse credo, eruditorum examini submittendi; quamobrem iis, quæ ad propositum morbi curativum vel parum vel nihil contribuere mihi videntur, non inhæsi, neque inhærebo deinceps. Paucis tamen sententiam meam aperire volui, quatenus prædictæ medicationes ad sanandam *Colicam* quicquam valeant, vel abjiciendæ sint penitus. Venæ sectionem interdum ægrotis levamen attulisse nega-

ri non posse videtur. Eam tamen raro Morbo nostro utilem credo; nec nisi in iis casibus, quibus Intestinorum excoriatio-
ni, & dolorificæ inde ortæ sensationi In-
flammati supervenerit; quod posse qui-
dem contingere indubium, sæpe contin-
gere, credibile admodum est. Dein quan-
do Inflammatio in Intestinis oborta, Mor-
bi causam antecedentem constituerit;
cum in primo statim initio Venæ sec-
tio celebranda, & omni alio Remedio
præmittenda est; inprimis si subjecta fue-
rint plethorica: non quidem propter
morbum, sed vel morbi Symptoma, vel
causam antegressam. Hisce vel iis multum
similibus casibus exceptis, a Venæ sectio-
ne, in *Colica piætonica* vix ullam utilita-
tem me vidisse memini; neque, ex hy-
pothesi nostra, morbo jam confirmato,
prævideri posse puto. De Vesicantibus, De Vesi-
Fonticulis & Cucurbitulis idem esto ju- cantibus,
dicium. In levissima jamjam orta Inflam- Fonticulis
matione, Derivationis loco non omnino & Cucur-
rejicienda; vel & quando a morbo cuta- bitulis,
neo, vel Podagra introversa *Colicæ* ori-
go deducenda videtur: illis solis morbum
cessasse nunquam sum expertus. De inu- De Us-
stione plantæ pedis aliorumve locorum tione ferro
candente ferro, vel accensæ Moxæ ope, & Moxa.
Asiaticis gentibus in frequenti usu, pro-
priis experimentis nihil affirmare neque

54 DE COLICA PICTONUM

De E-
meticis &
Purganti-
bus.

negare possum; ad nostram vero *Colicam* profuturam nullo ratiocinio adducor: experimenta de Ulcusculo vel pustula in pede exortis, de quibus jam ante (§. XVII.) facta fuit mentio, nimis parca & rara sunt, quam quod ejusmodi medicationis methodus iis, fundamenti loco superstrui possit. Emetica vel Purgantia drastica raro in usum venire posse, ex antedictis facile perspicitur: malum augere & exasperare potius, Mucum lubricantem defectu peccantem magis deglubendo; quam minuere apta nata videntur. Unicus tamen vel alter Casus jure merito excipiendus; quando nimirum veneni vel venenati alicujus ingesti, & in Ventriculo vel Intestinis adhuc morantis, facileque exinde Vomitorio, vel forti Purgatorio eliminandi suspicio est: quod & ad aliam materiam qualemcunque, Intestinis inimicam, Morboque colico ansam præbituram, vel nato jam pabulum addituram, extendi posse, non diffitebor; Morbo autem consummato non prodesse, certissime mihi persuasus videor.

§. XXVI.

Diæta. Diæta Morbo, viribusque Digestionis fractis accommodanda est. Eupepta, demulcentia & simul nutrientia optima sunt:

ut

ut farinosa quævis ex Lacte cocta; Ova forbilia; juscula gelatinosa ex carnibus ovillis, vervecinis; gallinaceis, quæ ob majorem glutinositatem, & nutriendi potentiam aliis præferenda. Carnes ipsæ, aliave durioris generis alimenta, in statu morbi interdicens sunt. Morbo allevato, vel ad finem inclinante, alia concedere licet. Olerum usus frequens & diuturnus maxime proficiuus, carniū paucus. Potus omnium optimus videtur Aqua spadana, vel alia quæcunque fontis medicati; vel sola, aut cum Lacte vel Vini modica quantitate mixta. Hujusmodi aquas non tantum ad Sitim extinguendam, & sensiles internas partes cum blanditie humectandas; sed & ad dolores leniendos, morbumque solvendum insigni virtute pollere (a) observamus.

§. XXVII.

Ad Convulsiones & Paralyfin quod De attinet; si Doloris sævities cito refrenari ^{Symptomatibus nervosis medendis;} potuerit, ut plurimum præveniuntur. Si supervenerint, nihil peculiare expostulant; consuetis adhibitis remediis superabiles sunt. Membrorum resolutio, Morbo sublato, ut plurimum, lento tamen gradu,

(a) *Cites.* de Dolore col. pag. 216, 224.

56 DE COLICA PICTONUM

du, cedit; sed & recidivante Morbo, haud infrequenter redit. Quod de Convulsionibus itidem, raro post levatos dolores subsistentibus, intelligendum est. Cæcitas, Aphonia, aliave nervorum vitia, Convulsionibus & Paralyfi rariora, non diu persistunt; neque Remediis, (nisi propter famam, ut Medicorum proverbium est) opus habere videntur.

§. XXVIII.

A Recidivis conservatio difficilis. **UTINAM** ægros, præcedenti methodo a Morbo liberatos, ab ejusdem Recidivæ assaultibus conservare arte nostra, possemus! Id difficile fieri quisque concedet, qui causæ proximæ, in præcedentibus assertæ, causam proegumenam obscurissimam esse perpenderit; cujus tamen posterioris exacta requiritur cognitio, ut præveniatur prior. Hanc, quia lente & clanculum agit, partesque afficit a conspectu remotas & absconditas, indagare quis poterit? Nec alii a Muci folliculosi vitio morbi omnes æque perspecti sunt. Narium epithelium ex tenuitate Pituitæ mucosæ defendentis sensibile & dolens reddi, a suscepta ex frigore Gravedine, quotidie experimur. Labiorum, Oris Fau-
ciumque internam superficiem, aphthoso morbo denudatam vel erosam, dolorem pa-
ti

ti videmus ex morbo quodam antegresso, Aphthas producente: sed quam sæpe sine manifesta causa appareant Aphthæ, illi norunt, qui in medicina faciunda Infantibus, senio fractis, vel chronico morbo debilitatis præfunt. Cuticulæ externæ a Cute separationem, ejusque excoriationem ab externis causis productam, oculis nostris observare, & proin prævenire possumus; ejusdem vero excoriationes spontaneas ab interna causa, haudquaquam perspecta nasci, morborum cutaneorum unanimi Medicorum consensu difficilis curatio, & contra renascentiam præmunio luculenter ostendit. At, quam multiplex causa in Intestina agere possit, ex Ingestorum, cum esculentorum tum potulentorum multiplici & diverso genere, nemo non protinus animadvertit. Lubricantem mucum, vel solito tenuiorem reddi, vel minus debita quantitate secerni, vel ab Intestinorum interiori tunica denique deglubi posse, in Intestinis ipsis hærente causa, vel aliunde delata, dubitari non potest; singulas autem harum conditionum *Colicæ* recidivam inferre posse, & revera inferre, non minus certum est. Quæ omnia si bene perpendantur, generalis Regulæ, vel Medicamenti specifici ad Morbi recidivam avertendam inventio

58 DE COLICA PICTONUM

sperari vix, ac ne vix quidem potest. Ex nocentibus forte & juvantibus, observatione sedula vel ægrotantium, vel Medicorum ipsis opitulantium detectis, canones quidam, Regiminis loco, tam vitandorum quam præstandorum, tradi possunt.

De Vi-
tandis.

Frigus majus, quam in statu sano corpori tolerabile, ad Intestina admissum, ejusmodi conditionem efficere valet, quæ omnibus, brevi post, miserrimis cruciatibus ansam præbet. Narratum memini ab ægris, hoc Morbo sæpius correptis, expedum frigore neglecto, subitissime se recidivantis *Colicæ* primordia sensisse. Frigus itaque Morbo inimicum, quam maxime vitandum; Pedes a frigore caute conservandi, panniculis vel spleniis, hyeme præsertim obvolvendi; Venter laneo panno, vel lineo multiplici, aut etiam charta papyracea, ut vult *Citesius* (a), muniendus. Corporis exercitia solito majora vitanda sunt: vehementem etenim & laboriosam exercitationem, cælo præsertim æstuoso, *Colicam* recidivantem vidit *Citesius* (b), vidi & ego ipse. Animi pathemata summopere compescenda, in-
pri-

(a) *Cites.* pag. 205.

(b) *Cites.* pag. 209.

primis vehemens iracundia; ex qua, non moderata lethalem Recidivam interdum observavi.

Hæc de vitandis; quæ præstanda sunt, De Faciendis.
ad pauca quædam capita referri possunt.

Alvus præsertim aperta servanda est, cibis humectantibus, aliisque lubricitatem Intestinorum procurantibus; vel & lenissimis Laxantibus aliquando assumtis. Vomitoriis intermedio tempore exhibitis, vel Purgationibus mercurialibus Recidivam præcaveri nunquam vidi. Lac asinum recens ab ubere mulctum, contra dolores præsentis non minus, quam levatorum metuendas Recidivas magnis laudibus extollitur. Omnium autem instar Aquarum medicatarum diuturnus usus, doloribus vincendis, & in futurum præveniendis, inservire videtur (a). Quibus ad-

(a) De Colica ex biliosis humoribus agens *Alexander Trallianus* sequentia annotavit: Frigida aqua usus sum, in quibus vires robustas, & principales partes illæsas deprehendi. Ac scio, levasse me omnino dolorem, & totum morbum, ne amplius reverteretur, prohibuisse; idque quum æger antea crebris accessionibus corripereetur. Lib. X. cap. 1. De gravissimis doloribus Intestinorum, in Paralyfin desinentibus, fomento ex linteaminibus triplicatis, frigidissima aqua madefactis, & Ventri appositis, sedatis; observatio ex *Cratone* prostat apud *Schenckium*, Obs. pag. 363.

60 DE COLICA PICTONUM

addere debeo, diutinam roborantium & adstringentium Medicamentorum, ad Curationem antea (§. XXIII.) præscriptorum continuationem, æquali, non dicam majori certitudine, Intestinorum robore in integrum restituto, ab horrendis *Colicæ* Recidivis præservare.

§. XXIX.

De *Cardialgia* feroci.

CARDIALGIÆ quoddam genus est, nostratibus familiare admodum, quod tribus, ut ajunt verbis, hic pertractari meretur. Asperrimo dolore infestat, ab assumtis esculentis imo & potulentis perpetuo exacerbata; ut præ metu doloris invasuri, a cibis non tantum omnibus abstineant; appetitu satis vigente. Ingesta solida, nonnunquam etiam fluida Nauseam excitant, quam sequuntur vomitiones pituitosæ materiæ, aliquando aquosæ; esculentis intus restitantes. Flatum & fœcum alvinarum deorsum eructatio vel excretio pertinaciter intercipitur. Dolor per intervalla quidem mitior, mox recrudescent, longus est; ægros, diuturnis cruciatibus & tolerata inedia, penitus exhaustos & macie consumptos reddit. Invadit hæc omnis quidem ætatis ac sexus homines, inprimis virgines, mulie-

lieres, imbecilles; minus viros robustos. Stomachicis calefacientibus curata exasperatur; vomitoriis vel purgantibus fortioribus levatur quandoque; ast brevi dein eodem furore redit. Ab arduis laboribus exacerbescit; & brumali tempore magis quam æstivo renovatur. Quandoque in Paralyfin terminatur; & sanata licet, recidivat.

§. XXX.

Videtur hicce Ventriculi morbus in *Colicæ* multis *Colicæ pictonicæ* quam simillimus, ^{*pictonicæ*} ^{*similis.*} loco affecto solo forte differens. Affirmare tamen minime volo Ventriculum, in hacce dicta *Cardialgia*, affectam partem semper constituere. Doloris sævitiem, ejusque curationem difficillimam, symptomata fere omnia cum *Colica* communia habet; immo & in *Colicam* lethalem eum aliquando transiisse vidi. Idcirco ex simili causa proxima, causa antecedente obscura manente, originem habere vix dubitandi locus superest. Ventriculi erosionem, proin & membranæ intimæ antea denudationem, Muco abrafo, vel excoriationem antea (§. X.) observationibus demonstratam dedimus. De Pituita largiter per alvum ejecta, ab ægro mordi-

ca-

catione Ventriculi affecto, morbo tamen non sublato, & postea difficile tollendo *Galenus* monet (a). A diutino, ob Alvi naturalem tarditatem Pilularum aloëticarum usu, *Cardialgiam*, abrafo, procul dubio, acri & inimico stimulo, Ventriculi Muco, vel etiam excoriata forte interiori tunica, exortam vidi.

§. XXXI.

Iisdem
Remediis
ac *Colica*
curanda.

Iisdem hic Morbus ac ipsa *Colica* Remediis & cautionibus curari & præveniri debet. Ego quicquid conatus fuerim, eum non, nisi hac sola methodo, vix unquam ad sanationem integram perducere potui; exhibitis autem, quæ antea descripta sunt, inprimis adstringentibus & sine calido stimulo roborantibus, sat larga copia, sat longo tempore feliciter perduxì (b); sine anodynis aliquando vel demulcentibus ullis. Licet, quod diffitendum minime est, omnibus quandoque Medicamentis, ut *Colica* pertinacissima, resistit non tantum,

(a) De Alimentor. facultat. Lib. I. cap. 1.

(b) Elixir Vitrioli *Mynsichti* multis laudibus ad roborandum Stomachum commemoratum prostat. Alumine solo, in debita aquæ copia soluto *Cardialgiam* pertinacissimam sublata vidi.

tum, sed exasperatur; erosione, ut verosimile est, in ulcus insanabile, imo lethale, mutato. Omnia itaque quæ de Colica dicta fuerunt hætenus, ad hunc morbum quoque applicanda sunt; quibus repetendis immorari opus non erit.

CORONIDIS tandem loco adjicere lubet casum unum alterumque, antea cum Academia Naturæ Curiosorum communicatum; de quibus, ne pertractationis ordo interrumpetur, uno verbo facta fuit mentio, (§. VII. 9. XIV.) & quorum ulteriorem enarrationem Lectori non omnino displicituram speravi.

Historia Colicæ habitualis & dysentericæ, Corticis Simaroubæ ope, felicissime curatæ.

Duodecimo Septembris die Anni MDCCXLII accersitus fui ad Virum triginta circiter annorum, natione Anglum, ex illustri familia natum, dolore Ventris acerbissimo decumbentem. Colicum dolorem, qualem nunc patiebatur, ipsi a primis infantia fere annis, familiarem fuisse naravit, vix medicamentis cedentem, subinde tamen pro tempore sedatum. Peregrinatus jam fuerat a primo Vere anni supra nominati, fere ad hoc usque tem-

tempus; ex Anglia *Amstelodamum*, *Amstelodamo* profectus magnam partem Germaniæ peragraverat, exinde denuo *Amstelodamum* reversus. Varias non tantum corporis defatigationes, sed & aëris inclementis præcipue injurias perpeffus fuit; adeo quidem, ut curru vectus, per triginta præter propter dies noctesque, perpetuis fere pluviis & imbribus fuerit expositus; imo & terra marique innumeras corporis vexationes tulerit. Toto interim hujus peregrinationis tempore, dolorem colicum, majori nunc, minori alio tempore cum ferocia sævientem secum traxit; ad quem superandum, ipsi, invito licet, *Pragæ*, multum sanguinis, ex utroque pede fuit detractum: quo valde debilitatus, non nisi summa cum molestia, *Be-rolinum* profectus fuit. Hic vero per tres circiter hebdomadas, propter intensissimum dolorem, detentus fuit, nullis, vel optimis Medicamentis a præclarissimo Dn. D. LIEBERKUHN exhibitis, levatum. *Bremæ* denuo præ dolore decubuit, & in maximum vitæ periculum fuit conjectus. Jussu Medici, ægro contrarium suadente, experientia edocto, de novo larga fuit instituta Venæ sectio, nullo quidem levamine, & magna virium jactura; quin & calidissimis insimul exhibitis Remediis,

do-

dolor magis fuerit exacerbatus. Benignitate naturæ tandem utcunque levatus, *Amstelodamum* rediit, ubi dolor immaniter rursus increvit, ut statim dictum. Alvus ipsi & liquida nunc erat & torminosa.

Præscripsi in hoc rerum statu Decoctum lenitivum, quod ingrediebantur *Chamæmeli flores* & *Rheum*, addita Syrupi Diacodii modica dosi. Dolor sequenti die fuit paulo mitior, alvi egestionem magis compactæ, Somnus autem per totam noctem omnino nullus. Præscripsi denuo simile Decoctum sine *Rheo*. Nox quæ sequebatur, Somnum quatuor vel quinque horarum concessit. Dolor multum fuit imminutus, alvi Dejectiones & minores & compactiores, insequente vero mane denuo frequentiores & liquidiores.

Decimo quinto Septembris, noctem transegerat insomnem. Dolor matutino tempore valde fuit exasperatus. Feces Decocto adsumto fere similes, cum pauxillo sanguinis permixtæ. Appetitus vige-
bat. Exhibui Conditum roborans & demulcens; quod licet assumeret, vix ullum levamen attulit. Morbi longitudinem considerans æger, in patriam redire voluit; neque dissuasi iter, morbi Curatio-
E nem

nem cum ipso ægro desperans. Circa vesp̄eram dolor vehementissime sæviit; alvi Dejectiones erant, ut ante, eadem, & cruentæ. Indicavit mihi, in Anglia sibi quandoque exhibitas fuisse quinquaginta guttulas Laudani liquidi *Sydenhami*, optimo cum successu. Præscripsi idcirco haustulum cum simili quantitate celebris hujus Tincturæ anodynæ, duabus vicibus adsumendum; quo exhausto, satis commode noctem transegit, parum tamen dormivit. Alvum non deposuit, nisi proximo mane. Dolor valde fuit imminutus.

XVII°. Septembris, vix dormivit. Dolor non quidem vehemens, Dejectiones tamen fere erant perpetuæ. Laudani liquidi *Sydenhami* copiam sufficientem a me petiit, ut in itinere, patriam versus, urgente necessitate, legitimam dosin haurire posset. Valedixit mihi, jam profecturus. Post meridiem vero denuo misit ad me, præscriberem Enema quoddam adstringens, ut alvi Fluxus, pro tempore saltem cohiberetur; dubius an status ejus suscipiendo itineri aptus foret. Exhibui Clysma, cum duobus *Opii* crudi granis; quod per tres quatuorve horas quidem retinuit, postea tamen, eodem, ut antea, modo dejecit: neque proficisci præ
do-

dolore , & continuis alvi Egestionibus potuit. Circa vesperam & mane sequenti febricitabat, & leviter delirare videbatur. Præscripsi Conditum roborans addito *cortice Peruviano* ; & Epithema Venti applicandum, ex *Spiritu Vini* & *Theriaca* compositum. Vespertino tempore dormibundus erat & delirans; dolor quidem non major; Feces copiosæ, fuscæ & sanguinolentæ. Enema valde adstringens injici curavi, quod per tres quatuorve quidem horas retinuit; postea vero, singulis iterum horis & semihoribus alvo obsequi coactus fuit.

In quibus rerum angustiis, cum non nisi certa mors expectanda videbatur, periculum facere volui, an *Simaroubæ* cortex, ante aliquot annos, postquam a Celeb. D. JUSSIEU, in Academiæ parisiensis monumentis descriptus fuerat, a me, primum, quantum novi, in nostra Regione in usum introductus, & in fluxionibus cruentis sæpissimè, cum fructu exhibitus, aliquid efficeret ad sistendas alvi Fluxiones sanguine permixtas. Præscripsi Corticis hujus drachmam unam, in pulvisculos sex dividendam, quorum omni bihorio unum adsumsit.

XIX°. Pomeridiano tempore obdormi-

re incepit; totamque fere fequentem noctem placide transegit.

XX°. Melius se habet. Feces mucosæ, albicantes, nullo fere sanguine permixtæ, carunculas quasi continentes dejiciuntur. Dolor non magnus; Febris vix ulla. Vocatus nunc fuit in consilium Collega meus doctissimus D. P. VAN LEEND, qui usus Corticis continuando assensum dedit. Pro potu exhibita fuit panatella, cui ingens Cinnamomi quantitas fuit adjecta. Circa Vesperam aliquoties iterum deiecit; feces autem naturalibus magis similes. Ultima, quam habuerat, hoc tempore dejectio valde torminosa fuit; quapropter Clyfma sedativum denuo fuit injectum.

XXI°. Ejusdem Septembris. Nox placida fuit. Bis tantum, & parum deiecit. Nauseabundus nunc utcunque, quod & in aliis ab usu corticis *Simaroubæ* frequenter observatur. Vesperi satis bene se habuit, vix deiecit; dolorem sentit vix ullum. Perstitit in usu Pulverum corticis *Simaroubæ*.

Die vigesimo secundo, alvi Egestionis perpetuo imminutæ, feces compactæ; dolor nullus; Appetitus viget, & vires revertuntur.

XXVI°. In meliorem statum redire continuo pergit; & sanitatis integræ brevi recuperandæ spes magna affulsit. Conquereretur de dolore circa exteriores anipartes, post dejectionum conatus, præcipue infestante; qui ab hæmorrhoidibus externis aut leviori partium excoriatione, ut videbatur, ortus, emolliente Linimento facile superatus fuit. Sicque bene valens in patriam discessit; in quam feliciter & bene constitutum se advenisse, literis ad me datis significavit non tantum, sed & postea in Hollandiam redux, lætus nunciavit ipse, vegetus torosusque.

Morbus hicce, cui & alios similes plures vidi, Specifico antidysenterico tandem curatus, raris tamen dejectionibus cruentis stipatus, an ad Colicam vel Dysenteriam referri mereatur, dubius hæsitavi & adhuc hæsito; quamobrem Colicam dysentericam eum dixi.

Historia Stranguriæ vel Tenesmi vesicæ, per viginti & ultra annos molestissimæ, subitissime curatæ.

Præclarus Vir 50 annos natus, a vigesimo & sexto ætatis suæ anno Stranguria molestissima vexatus fuit. Totalem quandoque per aliquot horas patitur Lotii sup-

70 DE COLICA PICTONUM

pressionem, cum perpetuis ad mingendum incitationibus, & cruciatibus omnem fere patientiam & longanimitatem superantibus; ut vigesies, vel ultra, naturæ conatibus, frustraneis licet, quandoque obedire, unica hora coactus sit; donec tandem magna cum vi Muci pituitosi copia quadam ex Urethra prorumpente, urinæ portio in Vesica contenta, secuta fuerit. Brevi post, quandoque citius, quandoque tardius, suppressio redit, iisdem cum molestiis, minoribus nunc, alio tempore majoribus. Mucus, qui cum urina excernebatur in varia fragmenta vel ramenta divisus, phlegmatibus crassis ex naribus excussis, vel exscreando ex aspera Arteria ejectis simillimus erat; alio tempore tenaciter cohærens, ad fundum matulæ in urina subsidens, & pelliculam repræsentans, totum ejus fundum obtegit, & effusa urina agglutinatus hæret; ejus nimirum indolis quam Pituitam vitream dixere veteres. Nonnunquam & striæ sanguinæ ipsi erant permixtæ; imo & merus sanguis haud raro post exonerationem Muci cum Urina, vel & post eam, solus exiit. Mucus iste sæpissime Urinæ jamjam ejectæ intime erat permixtus & liquidus liquorem cum ea homogeneous, non nisi minori pelluciditate, vel

vel leviuscula turbulentia a naturali differentem constituens, & calida existente Urina, in eodem statu persistens; perfrigerata autem eadem subsidebat modo statim explicato. Quod in aliis ægris eodem affectu laborantibus frequentissime observatur. Urina foetida valde, eoque magis quo minus libere evacuari ab ægro poterat. Miserrimis hisce doloribus & perpetuo redeuntibus cruciatibus, per tot annorum seriem toleratis, nobilis Vir debilitatus & emaciatus penitus vitam traxit tœdiosissimam.

Morbus, id referente ægro, initium sumsit a suppressione urinæ subitanea, post largiorem vini rubri potum. Suppressio tunc temporis quidem sublata fuit, Cataplasmate ex *Cærefolio*, supra Regionem Pubis applicato, donec Urina guttatim efflueret; suppressione tamen, ut antea redeunte; tertio quartove die, etiam ut ante denuo sublata; tandemque Muci exitu accedente in morbum chronicum statim descriptum abiit.

Consuluit æger præstantissimos in nostra Regione Medicos fere omnes; qui varia quidem proposuerunt vel exhibuerunt Medicamenta, ex quibus omnibus speratum effectum sensit nullum. Lenientia & Involventia quæ præscribebantur,

optimum ; pellentia & Diuretica pessimum ediderunt effectum. Tandem, Augusto mense Anni MDCCXLVI ad me quoque pervenit, consilium flagitans, versus dirissimum hunc vitæ suæ & incolumitatis hostem. Me autem Remedia ad morbum vincendum nescire; neque hactenus arte nostra detecta, saltem in publicum indicata esse, palam sum professus. In solatium tamen ægri, & ne nihil agere velle viderer, Demulcentia quædam mucilaginosæ, & partes solidas roborantia propinavi; aliquali, in principio, ut videbatur, cum levamine: morbo nihilominus manente eodem. Sæpius, dein ab ægro instigatus, ut si quid possem, ipsi præstarem auxilii, in eas meditando incidi cogitationes, num forsitan Adstringentibus fortioribus id effici posset ne Mucus, Vesicæ amicus & naturalis; cujus perpetua abscessio, omnium symptomatum causa, morbum immedicabilem reddebat, a Vesica, ductuque urinario demitteretur: quo in Vesica permanente, eamque ab irritatione urinæ defendente, morbo solamen vel finem imponi posse credidi. Præscripsi itaque Elixir quoddam vitriolicum extemporaneum, ex *Tinctura corticis Peruviani*, *Tinctura corticis Cinnamomi*, & *Vitrioli*

trioli spiritu compositum, quod guttatim cum pauxillo Aquæ pluvialis, vehiculi loco, sæpius de die assumendum dedi. Mirum, quod toties, quoties interrogatus æger affirmavit, secundo post assumtum hoc Medicamentum die, parum admodum pituitosi Muci cum urina excrevit; exitusque fuit facilis; dolores & cruciatus soliti inter mingendum valde imminuti; neque posthac Mucus, ea ut ante copia secessit unquam. Perstitit æger, me consulente, in usu Medicamenti constantia singulari & raro a Medicis visa, per integrum, & quod excedit annum, morbo fere penitus evanescente. Leviores nonnunquam inter mingendum habuit molestias, brevi cessantes. Strictiori infimul Diætæ a me addictus fuit; abstinentiæ a Vino, omnibusque urinam stimulantibus & diureticis, exercitiis validis, vectione super strata viarum, cursu vehementiori & similibus; quam dum semel iterumque transgredi cœpisset, malum Recidivam molitur; quiete tamen, abstinentia, & usu prædicti Medicamenti, vel ejus loco *Tincturæ Succi Catechu*, cum *Tinctura Corticis Peruviani* combinatæ, brevi sedatum, ægro perfecta frui sanitate concessit.

Varia quidem, nec inutilia credo, con-
fectaria, ex hacce morbi historia alibi
deduxi, ad finem, mihi in pertractatio-
ne *Colicæ* propositum non pertinentia;
quare iis recensendis operam nullam im-
pendo.

F I N I S.



D E

NATURA, SEDE ET ORIGINE

HYDATIDUM

DISQUISITIO.

*Obscura quædam esse --- nec tamen ab illis
ita dicuntur de industria: Sed inest in
rebus ipsis obscuritas.*

CICERO.



D E

NATURA, SEDE ET ORIGINE
HYDATIDUM
DISQUISITIO.



PARS PRIMA.

§. I.



YDATIS (Υδατὶς) non omni *Hydati-*
tempore, apud medicos scri-^{dis} Defini-
ptores, eundem corporis af-^{tio.}
fectum significat. Veterum
plurimi per eam intellexerunt
Incrementum pinguedinis superiori Pal-
pebræ substratæ, ut ex Gorraei Defini-
tionibus & Foessii Oeconomia Hippocrat.
videre est. Vel, secundum aliorum am-
pliores descriptionem, est *Tumor mollis*
& laxus, Palpebram, quam obsidet, æ-
dematofam reddens. Hodie, latiori sen-
su, usu recepto, denotat *Vesiculam seu*
ampullulam membranaceam, humore lim-
pido aquoso, vel tenaciori glutinoso a-
liove

78 DE HYDATIDUM NATURA,

liove repletam, ubicunque in corpore reperiatur; sive parti cuidam vel visceri connexam, vel in cavo quodam, ab omni alia parte liberam seclusam. Hac significatione, de *Hydatidum* natura verba facturus, vocem intelligi volo; neque aliam descriptionem dicendis præmittam; cum ex ipsa quæ sequitur disceptatione earum historia liquido patebit.

§. II.

Aliorum de *Hydatidibus* opiniones propriis cogitationibus anteponendæ, Antequam proprias de natura & origine *Hydatidum* commentationes proponam; præcipuas, quæ extant, Clarissimorum virorum, de earum indole cogitationes & conjecturas, in epitomen redactas, in medium proferre volui: ut quid de themate hoc, in Medicina celebri, vel adfirmatum reperitur vel negatum, unico quasi intuitu patefceret.

§. III.

A Veteribus *Hydatidum* naturam non percepta. Inter Veteres nec HIPPOCRATES nec GALENUS, ubi de HYDATIDIBUS observatis mentionem faciunt, quidquam de earum vel indole vel ortu speciatim monent. ARETÆUS vesiculas aquosas, id est, *Hydatides*, summa quidem cum accuratatione describit; genuinam tamen earum

run-

rundem vel originem vel causam se ignorare fatetur (a).

§. IV.

Fuerunt inter posteriorum seculorum Recentiorum scriptores, qui a concretione Pituitæ lentæ Scriptorum opinionēs. *Hydatides* oriri existimarunt; inter quos *Carolus PISO*, qui de *Hydatidum* in Pulmonibus repertarum causa agens, sequentia protulit: „ Non est profecto A Concretione Pituitæ lentæ ori-
 „ difficilis inquisitio *Hydatidum*, quæ
 „ medio in Pulmone mihi observatæ.
 „ Nam quid mirum, serum tantillo mu-
 „ co, vel potius purulentæ materiæ ex-
 „ quisite permixtum, alicubi colligi, &
 „ ejus puris, sive pituitæ lentæ partem,
 „ concrefcere in vesicam, sive cystin, ut
 „ in Abscessibus satis frequentibus, Athe-
 „ romate, Steatomate & Meliceride (b)“?
 Cum ista *Pisonis* opinione congruunt quæ

(a) *Aretæi* verba notatu digna hæc sunt: „ Un-
 „ de id genus vesiculæ eruperint via haud facile re-
 „ peritur. Alii namque affirmant hujusmodi am-
 „ pullas per Intestina transisse: (de *Hydatidibus* in
 „ Abdomine latentibus agit) ego vero id nunquam
 „ vidi: idcirco neque nunc scribendo affirmo. Nam
 „ sive ex Intestino Còlo, sive ex Ventre ferantur,
 „ qualis sit ipsarum generationis modus, quid dicam
 „ nihil certi habeo“. De Caus. & Sign. Morbor.,
 diut. Lib. II. cap. 1.

(b) *Car. Pison.* Observ. Sect. III. cap. 7.

80 DE HYDATIDUM NATURA,

quæ ex Commentariis *Academiæ Scientiarum Petropolitanae*, *Commercio literario Norimb.* inserta leguntur: *Vesicas* nempe *aquosas* ex bullis humorum vitiosis-
rum magis, quam organicarum partium
fragmentis, originem trahere (a): & a
clarissimo MALOET in observationibus
Academiæ regię Parisinæ tradita inve-
niuntur (b).

§. V.

Glandu-
las esse.

Alii statuerunt glandulas esse, humore
intus infarto tumentes, & e situ natura-
li delapsas. Pro hac sententia stetit olim
RUISCHIUS, licet ignorantiam suam an-
tea ingenue erat professus (c). Magnus
BOERHAAVIUS hanc opinionem acri-
ter defendit, & quidem contra *Rui-
schium* (d) aliter postea sentientem (e).
Cui adjungendus præclarissimus SCHREI-
BERUS, qui in mediis *Ruischii* laudi-
bus, in Auctoris sui sententiam acerbè
fatis invehitur; *Hydatidem* folliculum es-
se asseverans, ab stagnantis aquæ aug-
men-

(a) *Commerc. literar.* 1731. pag. 227.

(b) *Memoires de l'Acad. Roy.* 1732. pag. 272;
Edit. Amstelod.

(c) *De Valvul. Observat.* XXV.

(d) *Opusc. Anatom. de fabrica Gland.* pag. 18.

(e) *Observat. Anatomico-Chirurg.* XLVI.

mento, in majorem elevatum bullulam (a). Nec non clarus inter Gallos Medicus & Chirurgus *Le Cat*, qui *Hydatides* nihil aliud esse existimat, præter glandulosa & lymphatica tubercula, Lienis externæ superficiei (de Hydatidibus in superficie Lienis observatis agit) morbo antegresso in excrescentias dilatata, & lymphæ extensa, quæ ratione morbi in iis collecta est (b).

§. VI.

Alii demum *Hydatides* oriri statuerunt ex distensione præternaturali Vasorum lymphaticorum, ab aqua intus circumclusa. Ea quidem opinio multis egregiis, in arte, Viris admodum placuit, &

Ex distensione
Vasorum
lymphaticorum
nasci,

(a) Histor. vitæ *Ruisch*. pag. 59.

(b) Philosophical Transact. n. 460. pag. 714. Ipsissima Auctoris verba, quoniam obscura nonnihil sunt, prout alio loco se explicuit, apponere lubet.

„ Les *Hydatides* — étoient continues dans la double des membranes du foye & de la ratte; & il m’a paru evident par l’état des parties affectées, que ce nombre prodigieux de petits ballons liquoreux étoit formé par les mammelons glanduleux de la surface de ces viscères, qui retenant par maladie la limphe chariée dans leur interieur, avoient été distendus par cette limphe & avoient ainsi formé ces ampoules aqueuses “, *Le Cat* Traité des Sens, pag. 165.

82 DE HYDATIDUM NATURA,

& maxime recepta videtur. Inter quos *Jacobus SPONIUS*, qui *Hydatides* declarat esse lymphaticorum vasorum Varices, seu dilatationes, a Lymphæ in corpore restagnantis copia productas (a). Egregius *WARTHONUS* *Hydatidum* ortum sequenti modo explicuit: „Si contingat Lymphæ ductus in Mesenterio
„ obstrui, quia valde fragiles sunt, facile rumpuntur, & aquas suas in Abdominis cavitatem exspuunt. --- -- Sin
„ vero Vasorum horum membranulæ tenaciores fuerint, ita, ut distensionem
„ notabilem, absque laceratione ferant,
„ in vesiculas quasdam aqua turgidas attolluntur, quas *Hydatides* vocant, &
„ peculiarem Ascitis speciem constituunt:
„ quamlibet autem vesiculam inter binas dictorum vasorum valvulas quam proximam efformari contingit. Quia vero
„ aqua nec prorsum propter obstructionem, nec retrorsum fluere potest, ob
„ valvularum interceptionem, interstitia intumescunt in figuram orbicularem,
„ utpote capacissimam, quæ figura in
„ *Hydatidibus* vulgo cernitur (b)“. *Michaëlis ETTMULLERI* sententia cum hac
War-

(a) *Bonet. Sepulchret. Anatom. Tom. II. pag. 530.*

(b) *Id. ibid. pag. 430.*

Warthoni descriptione fere congruit (a). Sic etiam *Gothofr. Bidloi* (b) & *Jac. Keilii* (c). *Frid. Ruischius* olim quoque hæsitantem quasi assensum huic opinioni tribuit (d). *Fridericus Hoffmannus* partim ad hanc, dein etiam ad aliam sententiam accessisse videtur. *Hydatides* enim oriri posse existimat, dum remissæ Lymphaticorum fibrillæ, a concluso inter binas valvulas humore, exterius urgentur, sensimque amplicatæ sacculos & vesicas efformant (e). Celebris *Morandus* hanc præ omnibus aliis assumendam esse, aperte testatus, & multis argumentis probare adnifus est (f).

§. VII.

Pro vasis sanguiferis præternaturaliter Vasa sanguiferata recipiuntur tandem a *Ruischio*: guifera esse præternaturaliter
 „ Ego vero censeo“, inquit, „*Hydatides* esse extremitates vasorum sanguiferata
 „ fe-multi statuunt,

(a) *Ettmull.* Colleg. practic. Sect. XXI. cap. 3. T. II.

(b) *Bidl.* Exercitat. Anatomico-Chirurg. de Hydatid.

(c) *Keil.* Tentam. pag. 26.

(d) *Ruisch.* Observat. Anatomico-Chirurg. XLVI.

(e) *Hoffmann* opuscul. pathologico-practic. Dec. II. Disf. VIII. §. 22.

(f) *Hist. de l'Academ. Roy.* 1723. pag. 33.

84 DE HYDATIDUM NATURA,

„ ferorum, quæ priorem suam mutave-
 „ runt naturam, atque in vitiosam dege-
 „ neraverunt fabricam. Id didici maxi-
 „ me ex eo, quod placentas, in quibus
 „ nulli Lymphæ ductus inveniuntur, a-
 „ liquoties spectaverim uterinas, immo
 „ & inter mea adservem huc usque, quæ
 „ unam partem omnino in *Hydatides*
 „ conversæ sunt, aliam vero partem sa-
 „ næ, quin immo habeo alias, quarum
 „ tota fere in *Hydatides* permutata cer-
 „ nitur (a)“. Alio loco hanc opinionem
 suam paulo fusius explicat: Vasa nempe
 sanguinea in *Hydatides* posse mutari,
 quia inter vasorum horum tunicas *tunica*
cellulosa reperiatur, cujus cellulæ in sta-
 tu præternaturali si repleantur latice a-
 quofo, cavum vasorum ita premitur, ut
 nihil cavitatis supermaneat; & sic obli-
 terantur non solum minora, verum etiam
 majora vasa (b). Adsentitur *Ruischio*
 præclarus inter nostrates Professor, eas-
 dem ob rationes a *Ruischio* adlatas; quo-
 niam placentas Uterinas, in quibus nulla
 vasa detexit Anatome (c), sæpe mutatas

vi-

(a) *Ruisch*. Adversar. Anatom. Dec. I.

(b) Thesaur. Anatom. VI. no. CIV.

(c) Quanquam ab aliis Placentæ & sua vascula
 lymphatica adscribuntur: *Boerb*. Prælect. Tom. V.
 P. II. pag. 289. *Hall*. ibid. Disputat. Anatom. se-
 lect. Vol. V. pag. 295.

vidit in *Hydatides*. Excellentissimus vir coram Auditoribus aliquando sic rem explicat. *Hydatides* oriri videntur ex transmutatis Arteriis & Venis. Canales enim arteriosi & venosi per intervalla constringuntur & laxantur, & per consequens vel in filamenta concresecunt, vel in *vesiculas* intumescunt.

§. VIII.

Fuisse quoque & alios, qui ex effusione humoris lymphatici, inter vicinas membranas *Hydatides* oriri statuerunt, paucis tantummodo locis adductis liquido patebit. Ex *Adr. SPIGELIO* sequentia profert *Bonetus*: „Tegitur (*Hepar*) „membrana tenuissima & simplici a li-
 Ex effusione humoris lymphatici inter vicinas membranas produci.
 „gamentis Hepatis enata, quæ arctissime parenchymati jungitur. Quod si „separetur alicubi, excedente e vasis aquosa materia, & collecta inter ipsam & „carnem ὑδατίδες Græcis dictæ generantur; quibus ruptis, effusaque in Abdominis cavitationem aqua, Hydrops Ascites nascitur (a)“. Eadem fere sententia stetit *Thomas BARTHOLINUS* (b), ut ex loco citato videri potest. GLASERUS

(a) *Bonet. Sepulchret. Anatom. Tom. II. pag. 434.*

(b) *Ibid.*

86 DE HYDATIDUM NATURA,

RUS ubi membranam Pinguedini substratam *Hydatidibus* scatentem viderat, eas in Membrana adiposa oriri statuit, Sero pelliculas a subiecta Pinguedine divellente; quod si diutius immoretur, tandem subtilioribus partibus dissipatis in gelatinam concrefcit. Adfentitur hifce Viris *Isbr. de DIEMERBROEK* (a). Sic etiam grandiores *vesiculas aquofas* produci cenfet laudatus antea *Ettmullerus* (b), *Joann. FONTANUS* (c), & *Laur. BELLINUS* (d). Quin & eadem hæc fententia a celeberrimo *Fr. HOFFMANNO*, æque ac alia de vaforum lymphaticorum mutatione admittitur (e). Addenda nunc eft præclariffimi *MONROI* fententia, ante primam hujus *Disquisitionis* emiffionem nondum publicata; Herniam aquofam cyfticam effe cellulam Membranæ adiposæ, liquore intus contento extenfam, cellulasque funiculi fpermatici in *Hydatides* permutari (f). Ut & Illuftris *HALLERI*, qui Glandulas vel eorum folliculos in *Hydatides* commutari; ova humana, in *Hydatides* paulatim au-

(a) Anatom. Corp. human. Lib. I. cap. 12.

(b) Loco antea citato.

(c) Observat. Med. & Anatom. Observat. XII.

(d) *Bellin.* de Urin. & Pulfib. pag. 170.

(e) Loco citato.

(f) Medical Esf. Edinb. Vol. V. pag. 302.

aucta, tandem in immensas massas intumescere; *Hydatides* folliculos adiposos esse aqua tumidos; eas omnino oriri, ubicunque *cellulosa Membrana* est; Placentæ in *Hydatides* mutatæ experimentum per immutata vasa explicari posse, & per *cellulosæ Membranæ* morbum, per glandulas non posse; scribit (a).

§. IX.

Unicus tandem *Eduard. TYLO* singulari de *Hydatidibus* condidit Hypothesin, eas nimirum peculiare Insectorum, seu Vermium genus esse, in animalium corporibus genitum. Varias quidem, ad Hypothesin stabiliendam considerationes adduxit Auctor; ast, quoniam omnia tentaminis gratia tantum exhibere voluit (b); neque assensorem, quantum liquet, habuit ullum, huic exponendæ opinioni, neque aliis quæ levioris momenti reperiuntur, immorabor.

Vermes
esse.

PARS

(a) Prælect. Boerh. Vol. II. pag. 469. 473. 496. Vol. V. P. II. 288, 289.

(b) *Bonnet*. Sepulchret. Anatom. Tom. II. pag. 508.



P A R S S E C U N D A.

§. X.

Hydati-
dum ex-
ortus ubi-
vis; ut
Membra-
na cellu-
losa ubi-
que præ-
tens.

AD eruendam *Hydatidum* naturam necesse erit, ipsa *Vesicularum* phœnomena penitius rimari. Agedum, intueamur sedulo, quæ ab Auctoribus fide dignis tradita, vel propria demum experientia detecta novimus. Occurrit primo generalis *Hydatidum* in omni corporis loco exortus. Nulla quippe datur, in corpore humano, pars, sive cavitas fit, sive in ea contentum viscus, quin *Hydatidibus* aliquando scatuerit. Exterior corporis superficies, strata inter Musculos, æque ac aliæ partes profundius sitæ, idem omnino commonstrant, ut ex infinitis observationibus notissimum est. Ad hanc *Hydatidum* proprietatem si attendamus; vix aliqua in corpore humano pars reperitur, huic phænomeno explicando magis idonea, quam *cellulosa* vel *adiposa Membrana*. Hæc enim ubique locorum, tam interne, quam externe adest; hac nulla magis universalis, cum vel ipsis vasis sanguiferis æqualis sit, vel ea superet. Neque quisquam dubitat in in-
tima

rima viscerum substantia *Cellulosam* inveniri; cum ex anatomicis jam satis superque demonstratum sit, eam omnia ambire vasa, omnes partes, quæ sibi mutuo cohærent, connectere: proin & inter omnia viscerum constituentia vasa adesse; & morbis sat multis, forsan & *Hydatidibus* producendis aptam natam esse. Ne ipsum quidem Cerebrum excipi debet: hujus enim visceris nobilissimi vasa, non minus quam aliorum, *Membrana cellulosa* investiuntur; proinde & ubique in encephali substantia æque ac alibi necessario adest; licet summa CREATORIS providentia cautum sit, ne facile, ob ingens Cerebri periculum, *pinguedo* abundet, vel *Membrana* nimis intumescat. Credunt præterea anatomici, tunicam Cerebri arachnoideam, *cellulosam* vel adiposam *Membranam* esse, ut in valde obesis & leucophlegmaticis observatum fuit (a): quin & *piam Matrem* in variis subjectis humanis *Pinguedine* diversis locis ditatam se invenisse refert *Ruifchius* (b); nisi inter hæc membranas interstratam esse dicere velimus. Nemini itaque dubitandi locus supererit, vasa plexus choroidei a *cellulosa* circumambiri investiri-

(a) *Kaan* Perspirat. Cap. XXXII. §. 177.

(b) *Ruifch.* Thesaur. V. Asf. I. n^o. XIII.

90 DE HYDATIDUM NATURA,

vestirique *Membrana*, quibus adeo frequenter *Hydatides* adhærent. Si itaque *Hydatides* in *Membrana cellulosa* stabulari assumam; quod in sequentibus vero admodum simile reddere conabor, ratio reddi potest, cur ubivis in corpore observentur.

§. XI.

Hydatides in *Cellulosa* seclusæ reperiuntur, iis producendis apta.

Accedit, *Hydatides* in ipsa *Cellulosa* conclusas sæpius reperiri. Quæ in puero, circa temporales arterias reperiiebantur apud *Bonetum* (a), in *Membrana cellulosa* sedem habuisse, vero quam simillimum videtur. Ex tumore in viro nobili, sub cartilagine ensiformi profilientes *Hydatides*, vix alibi latere potuerunt, nisi in ipsa *adiposa Membrana* (b). Ipse ego ex Abscessu purulento, in hypochondrio dextro *Hydatides* excretas cum viderim, ex *Cellulosa* provenire dubitari minime potui. Idem procul dubio de corporibus glandulosis & vesicularibus e tumoribus externis procidentibus, quorum apud *SCHENCKIUM* (c), *SCHULTETUM*,

(a) *Bonet*. Sepulchret. Tom. I. pag. 31.

(b) Sepulchret. Tom. III. pag. 270.

(c) *Schenck*. Observat. Lib. V. pag. 682. 676.

TUM (a), SCHOUTENUM (b), BIDLOUM (c), aliosque mentio fit, statuendum crit. Verosimile itaque videtur, *cellulosam* seu *adiposam Membranam* producendis *Hydatidibus*, vel ad minimum, condendis aptissimam esse.

§. XII.

Aliquando medias inter *Hydatides* Globuli Globuli quidam sebacei, seu corpora se-
baceam substantiam æmulantia, simul ex-
cernuntur. Multa millia glandularum di-
versæ magnitudinis, Sevi adinstar, in
Omento militis hydropici inventa fuisse,
ex Ephemeridibus Academiae Naturæ Cu-
riorum refert *Bonetus* (d). In Mesen-
terio mulieris sexagenariæ infiniti detecti
sunt Abscessus, sua quique cysti inclusi,
alii quidem oleoso, melleo alii, alii *seba-*
ceo, alii albugineo, alii aquoso humore
referti (e). De ingenti numero *Hydati-*
dum, simul cum sebacea substantia, de-
scriptionem dedit clarissimus CAMERA-
RIUS (f). Corpuscula rotundo-plana,
sevo

(a) *Schultet.* Armamentar. Chirurg. P. II. pag. 676.

(b) *Schouten* van de Gezwellen II Deel pag. 537.

(c) *Bidl.* Exercitat. de Hydatid. pag. 14.

(d) *Bonet.* Sepulchret. Tom. II. pag. 520.

(e) *Id.* ibid. pag. 450.

(f) *Act.* Physico-med. Vol. VIII. Observ. 120.

92 DE HYDATIDUM NATURA,

sevo indurato, substantiæ habita ratione valde similia, cum *vesiculis aquosis* una erumpere vidi in casu antea (§. XI.) memorato. De exiguis Abscessibus, infinito numero, in corpore interno observatis, in quibus sebum contentum inveniebatur, mentio fit apud sæpius citatum *Bonnetum* (a). Celebris apud Edinburgenses Anatomes Professor *Al. Monro* sebaceum & vesiculare corpus, ex vesiculis aquosis, mucosis & steatomatosis constans, in dissecta hydropica, se observasse testatur (b). Ex quibus omnibus aliqua saltem; me iudice, suspicio nascitur, *Hydatides* ex eodem fonte, in iisdem casibus, originem traxisse, ex quo corpora solidiora, quæ cum iisdem una prodierunt, exorta fuisse credimus. Hæcce vero *Membrana adiposæ* producta fuisse, ipsa horum substantia & indoles significare videntur. Nulla etenim pars corporis, quin sua natura de pinguedine participet, præter naturam, in *Pinguedinem* mutabitur. Quoniam itaque, ab omnibus fere Scriptoribus, ejusmodi corpora Adipi æquiparantur; extra omne dubium censeo, ex ipsa *Pinguedine*, vel membranoso corpore, in statu sano, *Pinguedinem*

(a) *Bonnet*. Sepulchret. Tom. II. pag. 435.

(b) *Mecical. Ess.* Vol. IV. pag. 439.

dinem continente, provenisse. Quam ob causam & *Hydatides* ipsas eidem membranæ ortum debere, summo jure, ut puto, concludo.

§. XIII.

Materies in *Vesiculis* contenta aqua Materies in *Hydatidibus* contenta suspicionem auct. est, vel serum limpidum, citrinum, turbidum, limosum: alio tempore humor pituitosus, viscosus, gelatinosus, pultaceus, caseosus, & quæ similis generis alii apud observatores inveniuntur. Omnia hæc diversæ naturæ contenta ex mutata *Pinguedine* ortum sumere, quam probabilissimum juxta meam quidem sententiam videtur. Notum quippe est, quam facile & varie mutabilis sit *Pinguedo*. In eodem homine jam *Cellulosam* implens, eum obesum torosumque reddit; brevi autem post, interveniente causa morbofa, humor suboleosus, tenuis vel aquosus cellularum cava replet; dum æque cito dein, œconomix animalis vitio sublato, verum oleum, seu *Pingue* ejus locum occupat. Dein *Pinguedinem* spontanea corruptione, variis modis quoque mutari in *cellulosa Membrana* posse observatur. Vidit Jac. DENYS, *leidensis*, dum viveret Chirurgus, Sectionem cæsaream instituens, ut vivum foetum, ex ma-

matre subito mortua, in lucem protraheret; in *Membrana cellulosa* materiem mediæ, inter *Pinguedinem* & aquam, naturæ. Multum enim flavi & suboleosi humoris ex dissecta abdominis *Cellulosa* effluebat. Ipsa quæ aderat *Pinguedo*, flavescens erat coloris, & congeriem vesicularum, seu sacculorum, circumfluentem & vix cohærente materia suboleosa repletorum, & mirifice ad invicem coadunatorum, monstrabat (*a*). Simile quid laudatus Auctor, in alia muliere gravida, sub aquis suffocata, quoque observavit (*b*). Sic in Actis physico-medice casus extat dissecti cadaveris, in quo, externe in capite, pectore & brachiis *Pinguedo* plane absumpta videbatur, ut sola fere cute tecta apparerent ossa, insimulque, a scrobiculo Cordis, usque ad Femora liquor lymphatico-serosus, coagulatus instar gelatinæ albicantis, vel inspissati lactis, musculos ita tegebat, ut particulatim auferri potuerit, parumque vel nihil digiti ab eo inquinarentur; in Abdomine vero saccus ingens, aqua plenus ab utero pendeat (*c*).
Pa-

(*a*) *Denys*, Ampt der Vroedmeesters en Vroedvr. pag. 58.

(*b*) Id. pag. 54.

(*c*) Act. physico-med. Academiæ Naturæ Curiosor. Vol. VI. pag. 331.

Patet ergo, me judice, fatis fufficienter, miras in corpore mutationes *Pinguedinem* fubire poffe, fola obfervatione detectas, ulteriusque detegendas. Ponamus, febaceam materiem in *Cellulofa* ftagnare, retineri, non retroire; mutabitur illa, prout in hanc aliamve indolem, coagulationis nempe, vel in humorem tenuem folutionis, magis minusve, natura fua, prona eft. Accedente dein caufa, qua *cellulofa* compages in *vesiculas*, vel corpora quædam globofa feparata permittitur, quod fieri poffe antea (§. XII.) affumfi; facile comprehendere poteft, diverfam in *Hydatidibus* contentam materiem, vel aquofam, vel gelatinofam vel cafeofam vel febofam, ex mutata *Pinguedine* in *cellulofa Membrana* oriri potuiffe.

§. XIV.

Videmus ex obfervationibus variorum Auctorum, *Vesiculas* complures facco majori haud raro includi, immo & easdem inclusas alias quoque minores tres quatuorve liberas, neque inter fe, neque cum aliis majoribus cohærentes intus continere fæpiſſime (a). Mirabile iſt hoc phæ-

Hydatidum in majori facco, vel & aliis *Hydatidibus* inclusione Membranæ cellulofæ ope explicari poteſt,

(a) Commerc. literar. Nor. 1731. pag. 271. Act. phyſico-med. Vol. III. Obſerv. 120.

phænomenon quomodo per ullam ex adlatis antea conjecturis, vel suppositionibus explicari possit, ego plane non percipio.

Ast, si attendamus ad ea, quæ magni nominis Anatomicus B. S. ALBINUS de *Membrana cellulosa*, Musculi partem efficiente, disertis verbis protulit, quicquam forte lucis huic difficultati affulgebit. Sic ille: „Ubi densior, ibi & e membranis insignioribus composita, cellulas
 „fatis magnas efficientibus, in quibus
 „quam plurimæ esse solent minores, interstinctæ membranis subtilioribus,
 „omnesque contextu fibrarum subtiliore
 „refertæ, quem rursus interstinguunt fibræ ejus crassiores (a)“. Videtur itaque *Membrana cellulosa* sic esse disposita, ut e membranulis, inter alias seclufis, novæ ubique cellulæ possint efformari, & simul præternaturali quacunque mutatione, v. g. induratione in *Pinguedine* oborta, membranas hæc ad invicem compingi, & in unam crassam tunicam abire posse. Supponamus, denuo, ex quacunque causa stagnationem oriri in materia in cellulis contenta; illa suam ubique cellulam singularem replebit, expandet, & in tumorem elevabit: eadem

(a) *Albin. Histor. Musculor. Lib. I, cap. 1. pag. 2;*

dem præterea causa, ex qua stagnatio hæc nata fuit, cellularum inter se invicem communicationem intercipient. Mutuo autem ex aliis in alias transitu denegato, humor ad secretionem affatim adlatus in cellulam depluens, illam continuo & implet & distendit; excitabitur proin tumor major minorve, prout natura causæ, vel ipsa cellulæ natura permiserit. Idem si in interioribus, quæ in externis continentur cellulis, contingat, similis quoque in iisdem orietur permutatio. Mirum igitur non est, quia omnia hæc separatim agunt, hæc cellulas, *Vesiculas aquosas* nunc vel *Hydatides* dicendas, sæpenumero nullo modo inter se connexas, immo & alias aliis demum inclusas reperiri. Addamus, quod observavit laudatus antea *Morandus*, *Vesicularum* membranas ex variis, ut plurimum tribus quatuorve & quandoque pluribus lamellis constare (a). Veluti de cysticis tumoribus aquosis, in Pulmonum lobis, etiam dixit *Maloet* (b), eandem *Membranæ cellulosæ* structuram quasi innuentes. In statu naturali, ut communicatio, sic etiam mutua cellularum datur cohæsiō; partes vero connectentes, sive membranosæ fuerint,

(a) Hist. de l'Academ. Royale, 1723. pag. 31.

(b) Mem. de l'Academ. Royale, 1732. pag. 353.

98 DE HYDATIDUM NATURA,

rint, five fibrosæ, teneræ admodum sunt & fragiles, propterea ad rupturam, aliqua in cellula facta præternaturali expansione, aptæ & pronæ. Eadem facilis ruptura humores, five crudos vel adiposos, five aquosos, in cavitates factas effundi urgebit; quibus tractu temporis magis magisque a statu naturali secedentibus innatantes inveniuntur vesiculæ minores, cum ipsis humoribus contentis haud raro sacco majori inclusæ. Magna quippe cellula, ex membranis crassioribus composita, sacco facile efformabit, ad minores includendos aptissimum. Ex hac denique perlustrata cellularum fabrica concipi facile potest, *Vesiculas aquosas* haud minus frequenter in cavo quodam corporis libere fluctuantes, quam aliis partibus adnexas reperiri. Si ergo prædicta phænomena nullo modo explicari possunt, nisi *Membranae cellulosa* ope, ut profecto videtur; & mediante hac omnia facillimo negotio se extricent; magnum exinde & gravissimum argumentum exfurgere puto, *Hydatides ex cellulosa Membrana* efformari.

§. XV.

Hydatides variis

Hydatides sæpissime variis in locis in eodem subjecto simul existentes, in externa

terna corporis superficie, & hepatis aliarumve partium absconditarum intimo parenchymate; immo & in omnibus sæpe numero visceribus pariter inveniri, docuerunt observationes doctorum virorum ubivis obviæ (a). Docemur inde, partem adfectam ubique locorum præsentem esse non tantum; sed & causam, ex qua *Hydatides* oriri possunt, vel ubivis adesse, vel quam facillime de loco in locum propagari posse. Sed quamnam quæso quispiam in corpore humano partem indicare poterit, omni in loco æque frequentem, & per quam causa quævis morbosa æque facile ad remotiora loca dispergi potest, præter nominatam jam sæpius *Membranam cellulosa*m. Hæc per totum corpus, ad minima pererrat; per hanc mutua contentæ materiæ communicatio datur, ut antea (§. XIV.) dictum: quæ si morbose afficiatur sic, ut *Hydatidibus* producendis occasio nascatur; facile in permultis locis eadem mala, iidem *tumores vesiculosi* excitari poterunt. Adeoque & hæcce *Hydatidum* circumstantia pro *Membrana cellulosa* haud leve argumentum suppeditare mihi videtur.

§. XVI.

(a) Volch. Coiter. Tab. Anatom. in Observationib. pag. 116. Boerh. Sepulchret. Anatom. Tom. II, pag. 431.

§. XVI.

Accedit
Hydati-
dum nu-
merus, in-
gens, &
Saccorum
includen-
tium ma-
gnitudo.

Ingens *Hydatidum* numerus, centenarium, immo & millenarium quandoque superans, si observatoribus fides non sit deneganda, & saccorum peculiarium stupenda magnitudo; cavitatem, verbi gratia, quadraginta & plurium mensurarum excedens (*a*), unde procedere possit, difficillimum explicatu sane videtur, nisi eadem mediante *adiposa Membrana*. Hæc ex cellulis infinitis majoribus atque minoribus constans, mirifice mutabilis non tantum, sed ad immensam quoque magnitudinem extensilis est. Orta itaque causa quacunque *Hydatides* gignente, pars illa *Cellulosæ* quæ *Hydatidibus* jam factis vicina est, eodem modo ac prior degenerabit; hancque rursus alia, quæ proxime adjacet, sequetur, unde tum *Hydatides* increfcunt numero fere infinito. Cum vero in parte quadam ampullosus productus fuerit tumor, aqua repletus, hic ultra imaginationem continuo increfcet; & quoniam pressioni illabentis aquæ, vel materiæ ad secretionem Pinguedinis adlatæ, non resistere potest tenera

(*a*) *Boner*. Sepulchret Anatom. pag. 520. *Commerc. Nor. literar.* 1731. pag. 271. *Ruisch*. Adversar. Anat. I.

nera *Cellulosæ* fabrica, quaquaversum expandetur & erumpet. Neque aliqua pars in corpore humano mihi nota est, quæ mutationibus hisce subeundis ullo modo apta haberi queat.

§. XVII.

Quædam *Vesiculæ* teneræ sunt, levis-
sima de causa fragiles, & leviori tantum
digitorum compressione in gelatinosam
quasi substantiam abeuntes; adeo quidem
ut citatus antea *Maloet* argumentum haud
infirmum exin desumi posse existimet pro
demonstranda *Hydatidum* genesi ex con-
cretionem humoris lymphatici gelatinosa.
Aliæ contra, imprimis majores vel soli-
tarie, tunicis gaudent satis crassis, soli-
dis firmisque. Utraque hæc, nisi vehe-
menter fallor, diversitas ex contempla-
tione *Membræ cellulosæ* sola facile dis-
solvitur & illustratur. Quam dissimilis si-
bi sit in variis locis hæc dicta *Mem-
brana*, docuerunt Anatomici. *Hydatides*
itaque, ex quam parte oriantur, ratio-
ne ad illam habita, vel crassiores erunt
& firmiores, vel teneriores & valde fra-
giles. Docent itidem quotidianæ observa-
tiones, *Cellulosam* crassam, multa pin-
gui gravatam, interveniente prava corpo-
ris constitutione, ita permutari posse, ut

Et ingens
Hydatidum
quoad sub-
stantiam
varietas.

in subtilissimam membranam, minima vi rumpendam, & mucum quasi gelatinosum abiisse videatur. Eandem contra tenuissimam membranam Pingui denuo infarciri, & in amplum crassumque & firmum corpus transire posse. Singulæ harum dissimilitudinum rationes, ex mutabili *Cellulosæ* fabrica petendæ, *Hydatidum* dictas varietates itidem demonstrant & explicant. Neque etiam causæ *Hydatides* efficientes semper sibi similes sunt. Nunc etenim una tantum alterave cellula comprimitur, pinguedinis motus retrogradus impeditur; alio tempore magna aquosi humoris copia ad hanc vel illam *Cellulosæ* partem adfertur. Sequitur itaque necessario, *Hydatides*, dum singulæ singulari modo increcant, alias aliis minores majoresve non tantum, verum etiam membranulas investientes vel solidiores & crassiores, vel subtiliores & laxè cohærentes extituras. Accedit, quod *cellulare* dictum corpus tam inferne, quam superne, tenui quidem, ipsis tamen cellulis multo fortiori membrana tectum investitumque sit (a); quæ si *Vesiculæ aquosæ* tunicam efformaverit, hanc crassam reddet firmamque. *Cellulæ* vero inter hancce duplicaturam locatæ, in *Hydati-*

(a) *Kaau Perspirat.* pag. 337. §. 806.

datides transmutatæ, e contrario subtiles erunt & flaccidæ. Eadem quoque ratione facile erit intelligere, alias invicem connexas, alias a reliquis separatas, in cavitate singulari deciduas observari; prout, nimirum, vel moles sive pondus, vel causa quævis cum impetu disrumpens, vel horum nihil intercefferit.

§. XVIII.

An quidem de rotunda *Hydatidum* figura verba facere, operæ sit pretium, valde dubito. *Cellulæ*, vel inter lamellas membranaceas relictæ areæ, sua natura in quamcunque figuram facile mutantur. Fluida quævis coërcita versus omnes plagas æqualiter premere, ex physicis notissimum est. Corpora membranacea cava flexibilia cum sint, a liquoribus intus contentis, in rotundam extendi figuram necesse est, nisi causa quædam externe agens impederit. Variorum generum in *adiposa Membrana* oriundi tumores ampullosi, vel sebacei, magis minusve rotundi sunt; & argumenti loco huic propositioni demonstrandæ inservire possunt.

§. XIX.

Ex hæcenus demonstratis facile percipitur Nec obscurum est

integras
corporis
partes in
Hydatides
mutari.

pitur integras humani corporis partes, viscera puta, aliasve in *Hydatides* converti posse; vix ullo vel vasorum, vel visceris remanente vestigio, quod magnopere miratus fuit *Ruifchius* (a). Neque etenim id magis mirandum, quam quod erumpente & divagante *Membrana cellulosa*, in Sarcoma vel Fungum permutata, partes non tantum molles, sed & solidissima ossa oblitterentur penitus (b): quam ob causam ipsa corporis ossa in carnosam vel carni similem substantiam transiisse dixit celeberrimus inter Chirurgos parisienses PETITUS. Simile quid in Hepate, aliisque partibus *Hydatidibus* refertis, dum tota quæ per intimam viscerum substantiam perambulat *Cellulosa*, eandem ubique passa fuerit metamorphosin, contingere posse, nemo negabit. Ad veritatem igitur, post varias fluctuationes, quam proxime accessisse videtur *Ruifchius*; cum ad constituendas *Hydatides*, sive integra viscerum parenchymata in *Hydatides* transmutanda, *Cellulosam* concurrere existimavit (c). Longissime vero eum aberrasse credo, quum ob *Hydatides* in

Pla-

(a) *Ruifch.* Thesaur. I. Aff. II. Thesaur. VI. No. XI.

(b) Conferantur quæ dixi in Exercitatione de Scirrho. Cap. VI. §. 8.

(c) *Ruifch.* Thesaur. VI. No. XI.

Placenta uterina observatas, earum secundum vasis solum sanguiferis addixerit. Hæc etenim pars, lymphaticis licet vasis destituta videatur (§. VII.) *cellulosa* tamen gaudet membrana, quæ in hac æque ac aliis quibusvis partibus easdem subire potest & sæpe subit mutationes morbosas. Possunt itaque in omni parte Placentæ uterinæ, quin & in tenerrimo pusilli embryonis umbilicali funiculo, ut in aliis omnibus corporis partibus, quod jam fuse satis me demonstrasse puto, eadem de causa exfurgere, prout a *Ruifchio* (a) aliisque observatæ fuerunt.

(a) Thesaur. VI. No. XLV. Observat. Anatomico-Chirurg. XIV. Crassiores forte funiculum, existimat *Hallerus*, a *Ruifchio* pro *Hydatide* habitum; qui & ipse similem bullæ vidisse funiculum dicit, verissimum tamen, in cuius altero fine punctum rubrum arteriam indicabat. Prælect. Boerhav. Vol. V. P. II. pag. 244.

F I N I S.

THE HISTORY OF THE
CITY OF LONDON
FROM THE FOUNDATION
TO THE PRESENT
BY
JOHN STOW
1618

ISAACUS TIRION excudit.

Ejusdem Auctoris Exercitatio Medico-Chirurgica de SCIRRHUS & CARCINOMATE; in qua etiam FUNGI & SARCOMATA pertractantur, 8^o.

Ejusdem Auctoris, *Genees-en Heelkundige Verhandeling van de SCIRRHUS en CANCER*, of *Knoest en Kreeft-gezwel*, waar in ook de Natuur van FUNGUS en SARCOMA, of het Uitwas en Vleesch-gezwel onderzocht wordt. Hier is bygevoegd eene Waarneming van SPINA BIFIDA, opgehelderd door eene Aftekening in Levens-grootte: beneffens eenige Bedenkingen over de Oorzaaken van dat Gebrek en andere tegennatuurlyke Gesteldheden; waar mede kinderen ter wereld komen, in groot 8^o.

Ejusdem Auctoris Dissertatio de GENERATIONE PURIS, Proemio, ab Academia Regia Chirurgica, quæ floret Parisiis, Ao. 1746. proposito condecorata, 8^o.

THOMÆ GLASS, Medici Angli, *Commentarii XII de Febribus ad Hippocratis Disciplinam Accommodati*, 8^o.

PHARMACOPOEA AMSTELÆDAMENSIS RENOVATA, in 4^{to}. & 12^{mo}.

PHARMACOPOEA Collegii Regalis Medicorum LONDINENSIS, *Juxta postremam Renovationem edita Londini Apud T. Longman. 1746. 8^o.*

Gezuiverde Geneeskunst, of kort Onderwys der meeste Inwendige Ziekten; ten nutte van Chirurgyens, die ter Zee of te Velde dienende, of in andere Omstandigheden zig genoodzaakt vinden dusdanige Ziekten te behandelen door JOHANNES DE GORTER *Med. Doctor en Professor*, gr. 8^o.

Proeve om Gezond en Lang te leven; uit langduurige Ondervinding in 't Engelsch beschreven door G. CHEYNE, M. D. en Lid van de Koninklyke Societeyt te Londen, 8^o.

Nieuwe Oeffening der Geneeskunde, behelsende een Beschryving van de Ziekten, derzelver Oorzaken, Kentekenen, Voortekenen en Hulpmiddelen, geschikt naar de wyze der beste, inzonderheid nieuwe Schryvers der Geneeskunde; door P. SHAW. Uit het Engelsch na den Vyfden Druk vertaald en met eenige Aanmerkingen vermeerderd in Gr. 8^o. 2 Deelen.

